

北斗真經

中國建築

商學部

國家圖書館 NATIONAL LIBRARY, TAIWAN, R.O.C.

持誦經訣

凡欲誦經必先盥漱清淨焚香嚴肅衣冠
平身端坐洗心滌慮絕念忘機正氣調聲
思真如對然後持念

淨心口神呪

丹朱口神

吐穢除氛

舌神正倫

通命養神

羅千齒神

却邪衛真

喉神虎賁

氣神引津

心神丹元

令我通真

思神鍊液

道炁常存

淨身神呪

靈寶天尊

安慰身形

五臟玄冥

青龍白虎

朱雀玄武

侍衛我真

安土地神呪

元始安鎮

普告萬靈

嶽瀆真官

土地祇靈

左社右稷

不得妄驚

回向正道

內外澄清

各安方位

脩守帝庭

太上有命

搜捕邪精

護法神王

保衛誦經

皈依大道

元亨利貞

淨天地神呪

洞中玄虛

晃朗太元

八方威神

使我自然

靈寶符命

普告九天

乾羅怛那

洞罡太玄

斬妖縛邪

殺鬼萬千

中山神呪

元始玉文

吾誦一遍

却鬼延年

按行五嶽

八海知聞

魔王束首

侍衛我軒

兇穢消蕩

道炁常存

開經玄蘊呪

雲篆太虛

浩劫之初

乍遐乍迤

或沉或浮

五方徘徊

一丈之餘

天真皇人

按筆乃書

以演洞章

次書靈符

元始降下

真文誕敷

昭昭其有

冥冥其無

沉痾能自痊

塵勞溺可浮

幽明將有賴

由是升仙都

太上洞玄靈寶無量度人上品妙經

道言。昔於始青天中。碧落空歌。大浮黎土。受

元始度人無量上品。

元始天尊當說是經。周迴十過。以召十方。始
當詣座。天真大神。上聖高尊。妙行真人。無鞅

數衆。乘空而來。飛雲丹霄。綠輿瓊輪。羽蓋垂
蔭。流精玉光。五色鬱勃。洞煥太空。七日七夜。
諸天日月星宿。璇璣玉衡。一時停輪。神風靜
默。山海藏雲。天無浮翳。四氣朗清。一國地土。
山川林木。緬平一等。無復高下。土皆作碧玉。

女莫不傾心。皆受護度。咸得長生。

道言。是時

元始天尊說經一遍。東方無極無量品至真大神。無鞅之衆。浮空而至。說經二遍。南方無極無量品至真大神。無鞅之衆。浮空而至。說經三遍。西方無極無量品至真大神。無鞅之衆。浮空而至。說經四遍。北方無極無量品至真大神。無鞅之衆。浮空而至。說經五遍。東北無極無量品至真大神。無鞅之衆。浮空而至。說經六遍。東南無極無量品至真大神。無鞅

之衆浮空而至說經七遍西南無極無量品
至真大神無鞅之衆浮空而至說經八遍西
北無極無量品至真大神無鞅之衆浮空而
至說經九遍上方無極無量品至真大神無
鞅之衆浮空而至說經十遍下方無極無量

品至真大神。無軼之衆。浮空而至。十遍周竟。
十方無極。天真大神。一時同至。一國男女。傾
心歸仰。來者有如細雨。密霧。無軼之衆。迨國
一半。土皆偏陷。非可禁止。於是元始懸一寶
珠。大如黍米。在空玄之中。去地五丈。元始登
引天真大神。上聖高尊。妙行真人。十方無極
至真大神。無軼數衆。俱入寶珠之中。天人仰
看。唯見勃勃從珠口中入。既入珠口。不知所
在。國人廓散。地還平正。無復歆陷。
元始即於寶珠之內。說經都竟。衆真監度。以

授於我。當此之時。喜慶難言。法事粗悉。諸天復位。倏歟之間。寂無遺響。是時天人遇值經法。普得濟度。全其本年。無有中傷。傾土皈依。咸行善心。不殺不害。不嫉不妬。不姪不盜。不貪不欲。不憎不妬。言無華綺。口無惡聲。齊同慈愛。異骨成親。國安民豐。欣樂太平。經始出教。一國以道。預有至心。崇奉禮敬。皆得度世。道言。

元始天尊說經中所言。並是諸天上帝內名。隱韻之音。亦是魔王內諱。百靈之隱名也。非

世上之常辭。上聖已成。真人通玄究微。能悉其章。誦之十過。諸天遙唱。萬帝設禮。河海靜默。山嶽藏雲。日月停景。璇璣不行。群魔束形。鬼精滅爽。迴屍起死。白骨成人。至學之士。誦之十過。則五帝侍衛。三果稽首。魔精喪眼。鬼妖滅爽。濟度垂死。絕而得生。所以爾者。學士穢氣未消。體未洞真。召制十方。威未制天。政德可伏。御地祇。束縛魔靈。但却死而已。不能更生。輕誦此章。身則被殃。供養尊禮。門戶興隆。世世昌熾。與善因緣。萬災不干。神明護門。

斯經尊妙。獨步玉京。度人無量。為萬道之宗。
巍巍大梵。德難可勝。

道言。凡誦是經十過。諸天齊到。億曾萬祖。幽
魂苦爽。皆即受度。上昇朱宮。格皆九年。受化
更生。得為貴人。而好學至經。功滿德就。皆得

神仙飛昇金闕遊宴玉京也。上學之士修誦
是經。皆即受度。飛昇南宮。世人受誦。則延壽
長年。後皆得作尸解之道。魂神暫滅。不經地
獄。即得返形。遊行太空。此經微妙。普度無窮。
一切天人。莫不受慶無量之福。生死蒙惠。上
天所寶。不傳下世。至士賁金寶。效心盟天。而
傳。輕泄漏慢。殃及九祖。長役鬼官。侍經五帝。
玉童玉女各二十四人。營衛神文。保護受經
者身。

道言。正月長齋誦詠是經。為上世亡魂斷地。

逮後。度上南宮。七月長齋。誦詠是經。身得神
仙。諸天書名。黃籙白簡。削死上生。十月長齋。
誦詠是經。為國王帝主。君臣父子。安鎮國祚。
保天長存。世世不絕。常為人君。安鎮其方。民
稱太平。八節之日。誦詠是經。得為九宮真人。
本命之日。誦詠是經。魂神澄正。萬炁常存。不
經苦惱。身有光明。三界侍衛。五帝司迎。萬神
朝禮。名書上天。功滿德就。飛昇上清。

道言行道之日。皆當香湯沐浴齋戒入室。
東向叩齒三十二通。上聞三十二天心拜。

三十二過閉目靜思身坐青黃白三色雲
氣之中內外翦冥有青龍白帝朱雀玄武
獅子白鶴羅列左右日月照明洞煥室內
項生圓象光映十方如此分明此修行經
法之旨使學者遵而行之以致感格後人
不解義理一樣刊寫從而念誦殊乖經意
今就改正其爇爐非登壇修行經法亦不
必用但只持念正經於理無舛

元始無量度人上品妙經
元始洞玄靈寶本章上品妙首十迴度人百

魔隱韻。離合自然。混沌赤文。無無上真。元始
祖劫。化生諸天。開明三景。是為天根。上無復
祖。唯道為身。五文開廓。普殖神靈。無文不光
無文不明。無文不立。無文不成。無文不度。無
文不生。是為大梵天中之天。鬱羅蕭臺。玉山

赤文開廓。普殖神靈。無文不光。無文不明。無文不立。無文不成。無文不度。無文不生。是為大梵天中之天。鬱羅蕭臺。玉山

上京上極無上大羅玉清渺渺劫仞若亡若存。三華離便大有妙庭金闕玉房森羅淨霏。大行梵炁周迴十方。中有度人不死之神。中有南極長生之君。中有度世司馬大神。中有好生韓君丈人。中有南上司命司錄延壽益筭度厄尊神。迴骸起死無量度人。今日校錄諸天臨軒。東方無極飛天神王。長生大聖。無量度人。南方無極飛天神王。長生大聖。無量度人。西方無極飛天神王。長生大聖。無量度人。北方無極飛天神王。長生大聖。無量度人。

東北無極飛天神王。長生大聖。無量度人。東
南無極飛天神王。長生大聖。無量度人。西南
無極飛天神王。長生大聖。無量度人。西北無
極飛天神王。長生大聖。無量度人。上方無極
飛天神王。長生大聖。無量度人。下方無極飛

天神王。長生大聖。無量度人。十方至真飛天
神王。長生度世。無量大神。並乘飛雲丹輿綠
輦。羽蓋璫輪。駃駕朱鳳。五色玄龍。建九色之
節。十絕靈旛。前嘯九鳳齊唱。後吹八鸞同鳴。
獅子白鶴。嘯歌邕邕。五老啓途。羣仙翼轅。億

乘萬騎。浮空而來。傾光迴駕。監真度生。諸天
丞相。南昌上宮。韓司主籙。監生大神。執籙把
籍。齊到帝前。隨所應度。嚴校諸天。普告三界。
無極神鄉。泉曲之府。北都羅酆。三官九署。十
二河源。上解祖考。億劫種親。疾除罪簿。落滅
惡根。不得拘留。逼合鬼羣。元始符命。時刻昇
遷。北都寒池。部衛形魄。制魔保舉。度品南宮。
死魂受鍊。仙化成人。生身受度。劫劫長存。隨
劫輪轉。與天齊年。永度三途五苦。八難超凌。
三界。逍遙上清。上清之天。天帝玉真。無色之

境梵行

東方八天

太皇黃曾天

太明玉完天

清明何童天

帝鬱鑑玉明

帝須阿那田

帝元育齊京

玄胎平育天

帝劉度內鮮

元明文舉天

帝醜法輪

上明七曜摩夷天

帝恬懽延

虛無越衡天

帝正定光

太極濛翳天

帝曲育九昌

南方八天

赤明和陽天

帝理禁上真

玄明恭華天

帝空謠醜音

耀明宗飄天

帝重光明

竺落皇笏天

帝摩夷妙辯

虛明堂曜天

觀明端靖天

玄明恭慶天

太煥極瑤天

西方八天

元載孔昇天

太安皇崖天

顯定極風天

始皇孝芒天

太皇翁重浮容天

帝阿邠婁生

帝鬱密羅千

帝龍羅菩提

帝宛黎無延

帝開真定光

帝婆婁阿貪

帝招真童

帝薩羅婁王

帝閔已狂

無思江由天

帝明梵光

上揲阮樂天

帝勃勃監

無極曇誓天

帝飄弩穹隆

北方八天

皓庭霄度天

帝慧覺昏

淵通元洞天

帝梵行觀生

太文翰寵妙成天

帝那育醜瑛

太素秀樂禁上天

帝龍羅覺長

太虛無上常容天

帝總監鬼神

太釋玉隆騰勝天

帝眇眇行元

龍變梵度天

帝運上玄玄

太極平育賈奕天

帝大擇法門

三十二天。三十二帝。諸天隱諱。諸天隱名。天
中空洞。自然靈章。諸天隱韻。天中之音。天中
之尊。天中之神。天中大魔。天中之靈。九和十

合變化上清。無量之奧。深不可詳。敷落神真。
晉度天人。今日欣慶受度。歷關諸天。請滅三
惡。斬絕地根。飛度五戶。名列太玄。魔王監舉。
無拘天門。東斗主筭。西斗記名。北斗落死。南
斗上生。中斗大魁。總監衆靈。青帝護魂。白帝
侍魄。赤帝養氣。黑帝通血。黃帝中主。萬神無
越。青天魔王。巴元醜伯。赤天魔王。負天擔石。
白天魔王。反山六目。黑天魔王。監醜朗馥。黃
天魔王。橫天擔力。五帝大魔。萬神之宗。飛行
鼓從。總領鬼兵。魔幢鼓節。遊觀太空。自號赫

奕諸天齊功。上天度人。嚴攝北酆。神公受命。
普掃不祥。八威吐毒。猛馬四張。天丁前驅。大
帥仗幡。擲火萬里。流鈴八衝。敢有干試。拒遏
上真。金鉞前戮。巨天後刑。層割鬼爽。風火無
停。千千截首。萬萬翦刑。魔無干犯。鬼無妖精。
三官北酆。明檢鬼營。不得容隱。金馬驛程。普
告無窮。萬神咸聽。三界五帝。列言上清。
元洞玉曆。龍漢延康。眇眇億劫。混沌之中。上
無復色。下無復淵。風澤洞虛。金剛乘天。天上
天下。無幽無冥。無形無影。無極無窮。溟滓大

梵寥廓無光。赤明開闢。運度自然。元始安鎮。
敷落五篇。赤書玉字。八威龍文。保制劫運。使
天長存。梵炁彌羅。萬範開張。元綱流演。三十
二天。輪轉無色。周迴十方。旋斗歷箕。回度五
常。三十五炁。總炁上元。八景冥合。炁入玄玄。
玄中太皇。上帝高真。汎景太霞。嘯詠洞章。金
真朗郁。流響雲營。玉音攝炁。靈風聚烟。紫虛
鬱秀。輔翼萬仙。千和萬合。自然成真。真中有
神。長生大君。無英公子。白元尊神。太一司命。
枕康合延。執符把籙。保命生根。上遊上清。出

入華房。八冥之內。細微之中。下鎮人身。泥丸
絳宮。中理五炁。混合百神。十轉回靈。萬炁齊
仙。仙道貴生。無量度人。上開八門。飛天法輪。
罪福禁戒。宿命因緣。普受開度。死魂生身。身
得受生。上聞諸天。諸天之上。各有生門。中有

空洞謠歌之章。魔王靈篇。辭參高真。

第一欲界飛空之音

人道渺渺。仙道莽莽。鬼道樂兮。當人生門。仙
道貴生。鬼道貴終。仙道常自吉。鬼道常自凶。
高上清靈爽。悲歌朗太空。惟願仙道成。不欲
人道窮。北都泉曲府。中有萬鬼群。但欲遏人
筭。斷絕人命門。阿人歌洞章。以攝北羅酆。束
送妖魔精。斬馘六鬼鋒。諸天炁蕩蕩。我道日
興隆。

第二色界魔王之章

落落高張。明炁四騫。梵行諸天。周廻十方。無
量大神。皆由我身。我有洞章。萬遍成仙。仙道
貴度。鬼道相連。天地渺莽。穢氣氛氛。三界樂
兮。過之長存。身度我界。體入自然。此時樂子。
薄由我恩。龍漢蕩蕩。何能別真。我界難度。故
作洞文。變化飛空。以試爾身。成敗懈怠。度者
幾人。笑爾不度。故為歌音。

第三無色界魔王歌曰

三界之上。眇眇大羅。上無色根。雲層峨峨。惟
有元始。浩劫之家。部制我界。統乘玄都。有過

我界身入玉虛。我位上王。匡御衆魔。空中萬
變穢氣紛葩。保真者少。迷惑者多。仙道難固。
鬼道易邪。人道者心。諒不由他。仙道貴實。人
道貴華。尔不樂仙道。三界那得過。其欲轉五
道。我當復柰何。

此三界之上。飛空之中。魔王歌音。音參洞章
誦之百遍。名度南宮。誦之千遍。魔王保迎。萬
遍道備。飛昇太空。過度三界。位登仙公。有聞
靈音。魔王敬形。敕制地祇。侍衛送迎。拔出地
戶。五苦八難。七祖昇遷。永離鬼官。魂度朱陵。

受鍊更生。是謂無量。普度無窮。有祕上天文。
諸天共所崇。泄慢墮地獄。禍及七祖翁。
道言。此二章並是諸天上帝。及至靈魔王隱
祕之音。皆是大梵之言。非世上常辭。言無韻
麗。曲無華宛。故謂玄奧。難可尋詳。上天所寶。

祕於玄都。紫微上宮。依玄科四萬劫一傳。若有至人。齋金寶質。心依舊格。告盟十天。然後而付焉。

道言。夫天地運度。亦有否終。日月五星。亦有虧盈。至聖神人。亦有休否。末學之夫。亦有疾傷。凡有此災。同氣皆當齋心修齋。六時行香。十遍轉經。福德立降。消諸不祥。無量之文。普度無窮。

道言。夫末學道淺。或仙品未充。運應滅度。身經太陰。臨過之時。同學至人。為其行香誦經。

十遍以度尸形如法。魂神迺上南宮。隨其學功。計日而得更生。轉輪不滅。便得神仙。

道言。夫天地運終。亦當修齋行香誦經。星宿錯度。日月失昏。亦當修齋行香誦經。四時失度。陰陽不調。亦當修齋行香誦經。國主有灾。兵革四興。亦當修齋行香誦經。疫毒流行。人民死傷。亦當修齋行香誦經。師友命過。亦當修齋行香誦經。夫齋戒誦經。功德甚重。上消天災。保鎮帝王。下攘毒害。以度兆民。生死受賴。其福難勝。故曰無量普度天人。

道言。凡有是經。能為天地帝主。兆民行是功德。有災之日。發心修齋。燒香誦經十過。皆諸天記名。萬神侍衛。右別至人。剋得為聖君。金闕之臣。諸天記人功過。毫分無失。天中魔王亦保舉爾身。得道者乃當洞明至言也。

諸天中大梵隱語。無量音
元始靈書中篇 道君撰

東方八天

寶婁阿耨

無怨觀音

須延明首

法攬菩曇

稼那阿奕

忽訶流吟

華都曲麗
散烟慶雲
無行上首
四象虛負

南方八天

鮮菩育臻
飛灑玉都
回蹠流玄

答落大梵
明魔上門
阿陀龍羅

南閻洞浮

玉眸說說

梵形落空

九靈推前

澤洛苦臺

綠羅大千

眇莽九醜

韶謠緣遭

雲上九都

飛生自騫

那育郁馥

摩羅法輪

霏持無鏡

攬姿運容

馥朗廓爽

神纓自宮

西方八天

刀利禪猷

婆尼咎通

宛藪滌色

太眇之堂

流羅梵萌

景蔚蕭嶠

易邈無窳

宛首少都

阿縵郁竺

華莫延由

九開自辯

阿那品首

無量扶蓋

浮羅合神

玉誕長桑

栢空度仙

北方八天

攬無自育

九日導乾

坤母東覆

形攝上玄

陀羅育邈

眇烝合雲

飛天大醜

總監上天

沙陀劫量

龍漢瑛鮮

碧落浮黎

空歌保珎

惡奕無品

洞妙自真

元梵恢漠

幽寂度人

道言。此諸天中大梵隱語。無量之音。舊文字
皆廣長一丈。天真皇人昔書其文。以為正音。
有知其音。能齋而誦之者。諸天皆遣飛天神
王下觀其身。書其功勤。上奏諸天。萬神朝禮。
地祇侍門。大勲魔王保舉上仙。道備剋得遊

行三界。昇入金門。

此音無所不辟。無所不攘。無所不度。無所不
成。天真自然之音也。故誦之致飛天下觀上
帝遙唱。萬神朝禮。三界侍軒。羣妖束首。鬼精
自亡。琳琅振響。十方肅清。河海靜默。山嶽吞

烟。萬靈振伏。招集羣仙。天無氛穢。地無妖塵。
冥惠洞清。大量玄玄也。

九天應元雷聲普化天尊玉樞寶經

開經偈

神霄雷祖帝

九天普化君

談道趺九鳳

持法騎麒麟

統攝聖嶽將

掌令判雷霆

三辛逢初六

察人善惡情

消災并度厄

稱名誦寶經

爾時

九天應元雷聲普化天尊。在玉清天中。與十方諸天帝君。會於玉虛九光之殿。鬱蕭彌羅之館。紫極曲密之房。閱太幽碧瑤之笈。考洞

微明晨之書。交頭接耳。細議重玄。諸多陪臣。
左右踧踖。

天尊宴坐。朗誦洞章。諸天帝君。長吟步虛。綵
女仙姝。散花旋繞。復相引領。遊戲翠宮。羣仙
導前。先節後鉞。龍旂鸞輅。飄飄太空。並集於
玉梵七寶層臺。時有雷師皓翁。於仙衆中。越
班而出。面

天尊前。頰頰作禮。勃變長跪。上白

天尊言。天尊大慈。天尊大聖。為羣生父。為萬
靈師。今者諸天。咸此良覲。適見

道惟是雷部鬼神。晝勞夕役。動有撫楚。大則
考戮。屑雲雕雪。無有已時。檄龍命鴉。此息彼
作。彼所因故。爾其耳焉。雷師皓翁及諸天諸
仙。聳耳而默。

天尊所坐。九鳳丹霞之宸。手舉金光明之如

道聞見亦泯。惟爾而已。爾尚非有。何況於道。
不聞而聞。何道可談。

天尊言。道者以誠而入。以默而守。以柔而用。
用誠似愚。用默似訥。用柔似拙。夫如是。則可
與忘形。可與忘我。可以忘忘。入道者知止。守

道者知謹。用道者知微。能知微則慧光生。能
知謹則聖智全。能知止則泰定安。泰定安則
聖智全。聖智全則慧光生。慧光生則與道為
一。是名真忘。惟其忘而不忘。忘無可忘。無可
忘者。即是至道。道在天地。天地不知。有情無

情。惟一無二。

天尊言。吾今於世。何以利生。為諸天人。演此妙寶。得悟之者。俾躋仙階。學道之士。信有氣數。夫風土不同。則稟受自異。故謂之氣。智愚不同。則清濁自異。故謂之數。數繫乎命。氣繫乎天。氣數所囿。天命所轄。若得真道。愚可以智。濁可以清。惟命俾之。愚昏昏。濁冥冥。亦風土稟受之移之。天地神其機。使人不知。則曰自然。使知其不知。則亦曰自然。自然之妙。雖妙於知。而所以妙。則自乎不知。然於道。則未

始有以愚之濁之。諸天聞已。四衆咸悅。

天尊言。吾今所說。即是玉樞寶經。若未來世。有諸衆生。得聞吾名。但冥心默想。作是念言。九天應元雷聲普化天尊。或一聲。或五七聲。或千百聲。吾即化形十方。運心三界。使稱名

者。咸得如意。十方三界。諸天諸地。日月星辰。
山河草木。飛走蠢動。若有知。若無知。天龍鬼
神。聞諸衆生。一稱吾名。如有不順者。戡首剗
心。化為微塵。

天尊言。吾是九天貞明大聖。每月初六。及旬

中辛日。監觀萬天。浮遊三界。若或有人。欲學
道。欲希仙。欲追九玄。欲釋三灾。當命正一道
士。或自同親友。於樓觀。於家庭。於里社。酌水
饋花。課誦此經。或一過。三五過。乃至數十百
過。即得神清氣爽。心廣體胖。凡所希求。悉應。

其感。

天尊言。身中九靈。何不召之。一曰天生。二曰無英。三曰玄珠。四曰正中。五曰子丹。六曰回回。七曰丹元。八曰太淵。九曰靈童。召之則吉。身中三精。何不呼之。一曰台光。二曰爽靈。三

曰幽精。呼之則慶。五心煩懣。六脉搶攘。四肢失寧。百節告急。宜誦此經。

天尊言。若或有人。五行奇蹇。九曜欽戰。年逢刑衝。運值剋戰。孤辰寡宿。羊刃劍鋒。劫煞亡神。鬼門鉤絞。祿遭破敗。馬落空亡。動用凶危。

行藏坎壈。即誦此經。上請天官解天厄。地官解地厄。水官解水厄。五帝解五方厄。四聖解四時厄。南辰解本命厄。北斗解一切厄。

天尊言。沉痾伏枕。痼疾壓身。積時弗瘳。求醫罔效。五神無主。四大不收。或是五帝三官之

前。泰山五道之前。日月星辰之前。山林草木之前。靈壇古跡之前。城隍社廟之前。里巷井竈之前。寺觀塔樓之前。或地府三十六獄。冥官七十二司。有諸冤枉。致此牽纏。或盟詛咒誓之所招。或債垛負償之所致。三世結繫。異

劫興仇。埒其咎尤。庫其執對。皆當省謝。即誦此經。

天尊言。天官符。地官符。年月日時各有官符。方隅向背。各有官符。大則官符。小則口舌。是有赤口白舌之神。以主之。凡諸動作興舉。出

入起居。不知避忌。如遇官符口舌。則使人擊
聒。曉夜煎燭。多招胥叻。面是背非。動致口牙。
盟神詛佛。始於謗讟。終於詬詆。由是獄訟生
焉。刑憲存焉。若欲脫之。即誦此經。遂得口舌
潛消。官符永息。

天尊言。土皇九壘。其司千二百神。土侯土伯。
土公土母。土子土孫。土家眷屬。若太歲。若將
軍。若鶴神。若太白。若九良。若劍鋒。若雌雄。若
金神。若火血。若身黃。若撞命。若三煞。若七煞。
若黃幡豹尾。若飛廉刀砧。如是等土家神煞。

若人興修卜筮。一或犯之。即致病患。以迄喪亡。纔誦此經。則萬神皆起。天無忌。地無忌。陰陽無忌。百無禁忌。

天尊言。世人夫婦。其於婚合。或犯咸池。或犯天狗。三刑六害。隔角交加。孤陰寡陽。天羅地

網。難於嗣息。多是孤獨。若欲求男。即誦此經。當有九天監生大神。招神攝風。遂生賢子。於其生產之時。太乙在門。司命在庭。或有冤愆。或有鬼魅。或有禁忌。或有凶厄。致令難產。請誦此經。即得九天衛房聖母。默與抱送。故能

臨盆有慶坐草無虞。凡有嬰孩在於襁褓。為
梅檀神王座下一十五種鬼。加諸惱害。因多
驚癇。宜誦此經。

天尊言。若人居止。鳥鼠送妖。蛇虫嫁孽。拋磚
擲瓦。驚雞弄狗。邀求祭祀。以至影脅夢逼。及
於姦盜。而敢據其所居。以為巢穴。遂使生人
被惑。庭戶不清。夜嘯於梁。晝瞰其室。牛馬犬
豕。六遭瘟疫。禍運骨肉。災及孳生。淫祠妖社。
黨庇神姦。帛客頻仍。喪車疊出。若誦此經。即
使鬼精滅爽。人物咸寧。

天尊言。九天雷公將軍。五方雷公將軍。八方
雲雷將軍。五方蠻雷使者。雷部總兵使者。莫
賺判官。發號施令。疾如風火。有廟可伐。有壇
可擊。有妖可除。有祟可遣。季世末法。多諸巫
覡。邪法流行。陰肆魘禱。是故上清。乃有天

禁鬼錄姦之庭。帝猷束妖考邪之房。能誦此經。其應如響。

天尊言。天瘟地瘟。二十五瘟。天蠱地蠱。二十四蠱。天瘵地瘵。三十六瘵。能誦此經。即使瘟瘵清淨。蠱毒消除。瘵瘵平復。亦有其由。或者先亡伏連。或者伏屍故炁。或者塚訟墓注。或者死魂染惹。或者屍炁感招。凡此鬼神。或悲思。或恚恨。牽連執證。並緣注射。乘隙伺間。乃得其便。故此經者。上通三天。下徹九泉。可以追薦魂爽。超度祖玄。

太上遣素車白馬大將軍以監之。

天尊言。若或有人。治裝遠行。賊盜騁姦。五兵加害。陸行則虎狼蝘蟻磨其牙。水行則蛟龍黿鼉張其頤。或灘瀨有幽枉之魂。或風濤有劫數之會。前亡後化。提生代死。能於此經。皈命投誠。故得水陸平康。行藏協吉。

天尊言。亢陽為虐。雨澤愆期。稽顙此經。應時甘澍。積陰為厲。雨水浸淫。稽顙此經。應時朗霽。祝融扇禍。飛火民居。赤鼠遊城。驚蕪黎庶。此經可以禳之。海若失經。魚鼈妄行。洪水稽

天。民生墊溺。此經可以止之。

天尊言。世人欲免三災九橫之厄。即於靜夜。稽首北辰。北辰之上。有三台。其星並躔。形如雙目。疊為三級。以覆斗魁。是名天階。若人見之。生前無刑囚之憂。身後不淪沒之苦。斗中復有尊帝二星。大如車輪。若人見之。留形住世。長生神仙。敕命此經。投心北極。即有冥感。斗為天樞。中有天罡。在內則為廉貞。在外則為破軍。雷城十二門。並隨天罡之所指。罡星指丑。其身未。所指者吉。所在者凶。餘位

皆然。若人見之。壽可千歲。

天尊言。世衰道微。人無德行。不忠君王。不孝
父母。不敬師長。不友兄弟。不誠夫婦。不義用
友。不畏天地。不懼神明。不禮三光。不重五穀。
身三口四。大秤小斗。殺生害命。人百已千。姦

私邪淫妖巫叛逆。從微至著。三官鼓筆。太一
移文。即付五雷。斬勘之司。先斬其神。後勘其
形。斬神誅魂。使之顛倒。人所鄙賤。人所嫌害。
人所怨惡。以致勘形震屍。使之崩裂。驅其捲
水。役其驅車。月覈旬校。復有考掠。一聞此經。
其罪即滅。若或有人。為雷所嗔。其屍不舉。水
火不受。即稱
九天應元雷聲普化天尊。作是念言。萬神稽
首。咸聽
吾命。

天尊言。此經功德。不可思議。往昔劫中。

神霄玉清真王長生大帝。所曾宣說。至士授經。皆當割金置幣。明盟天以傳。雷師皓翁長跪拜興。重白。

天尊言。是經在處。當令土地司命。隨所守護。

雷部按臨。以時稽審。若人家有此經。至誠安奉。即得祥烟滿庭。慶雲蔭軒。禍亂不萌。吉福來萃。於其亡歿。不經地獄。所以者何。死即往生。生歸善道。承

天尊力。有此靈通。出入起居。佩帶此經。衆人

所欽鬼神所畏。遇諸險難。一心稱名。

九天應元雷聲普化天尊。悉得解脫。於是雷師皓翁對

天尊前而說偈曰。

無上玉清王。統天三十六。九天普化君。

化形十方界。

披髮騎麒麟。

赤脚躡層冰。

手把九天炁。

嘯風鞭雷霆。

能以智慧力。

懾伏諸魔精。

濟度長夜魂。

利益於衆生。

如彼銀河水。

千眼千月輪。

誓於未來世。

永揚天尊教。

時雷師皓翁說是偈已。

天尊言。此經傳世。世人未知。吾今所治九天
應元府。府有九天雷門使者。以糾錄典者。廉
訪典者佐之。復有四司。一曰掠剩司。二曰積
逮司。三曰幽枉司。四曰報應司。各有大夫。以

掌其事。吾之所理。卿師使相。咸贊元化。

天尊說是經畢。玉梵七寶層臺。天花繽紛。瓊香繚繞。十方諸天帝君。咸稱善哉。天龍鬼神。雷部官衆。三界萬靈。皆大歡喜。信受奉行。九天應元雷聲普化天尊玉樞寶經。

太上洞玄靈寶昇玄消災護命妙經

稽首皈依衆妙道。至心恭敬二玄真。
今運一心心所議。粗識此經經所因。
空色空無有性。有無無有色空均。
慧風出自天尊力。掃除心界不遺塵。

惟願神光常擁護 證明今日守心人
今日守心何所證 不失凡身得道身

爾時

元始天尊。在七寶林中。五明宮內。與無極聖
衆俱放無極光明。照無極世界。觀無極衆生。

受無極苦惱。宛轉世間輪迴生死。漂浪愛河。
流吹慾海。沉滯聲色。迷惑有無。无空有空。无
色有色。无无有无。有有无有。終始暗昧。不能
自明。畢竟迷惑。

天尊告曰。汝等衆生。從不有中。有。不无中。无。

不色中色。不空中空。非有為有。非无為无。非色為色。非空為空。空即是空。空无定空。色即是色。色无定色。即色是空。即空是色。若能知空不空。知色不色。名為照了。始達妙音。識无空法。洞觀无碍。入衆妙門。自然解悟。離諸疑網。不著空見。清淨六根。斷諸邪障。我即為汝說。是妙經。名曰護命。濟度衆生。傳教世間。流通讀誦。即有飛天神王。破邪金剛。護法靈童。救苦真人。金精猛獸。各百億萬衆。俱侍衛是經。隨所擁護。捍厄扶衰。度一切衆生。離諸染

著爾時

天尊即說偈曰。

視不見我

聽不得聞

離種種邊

名為妙道

太上洞玄靈寶昇玄消災護命妙經

元始天尊說十一曜大消灾神呪經

爾時元始天尊在大羅天上玉京山中。騫林樹下。鳴大法鼓。扣木法鐘。普集十方三界諸天諸地。日月星宿。一切聖衆。為說過去未來一切衆生。善惡報應。灾福因緣。時於座中。有一真人。名曰青羅。即於座起。瞻仰尊顏。稽首再拜。長跪而言。弟子夙生慶幸。得遇人天。伏遇天尊大慈。設大法橋。廣為衆生。說諸因緣。令得開悟。普入法門。臣今下觀慾界衆生。以何因緣。四時之中。橫遭刑獄。一生之內。疾病纏

綿。或分野州縣水火災荒。兵戈競起。疫疾流行。臣今未悟。幸望

天尊特開慈憫。以釋愚蒙。

天尊隱几而言。奇哉青羅。能為衆生問諸緣業。切以慾界衆生。輪迴生死。沈溺愛河。惟務

貪生。不修正道。不知有五行推運。十一曜照臨。主其災福。至如土火留伏。金木凌犯。羅計勃達。日月薄蝕。致以州縣播遷。人民災難。水火蟲蝗。刀兵相犯。悉皆由也。凡以衆生託蔭為人。皆稟陰陽造化。或貴或賤。或富或貧。定

分雖殊。災福一矣。至如

帝王國主。后妃。臣僚。係於紫微垣中。各有品
位。五嶽四瀆。乃如分野。一切人民。屬於日月
五星。臨照。吾今示汝。下觀星斗。看其行度。如
有五星不順。凌犯宮宿。照臨帝王。及諸分野。
災難競起。疫毒流行。兆民死傷。速令塑繪十
一曜形儀。於清淨處。建立道場。嚴備香。花。燈
燭。請命道士。或自持念十一曜大消災神呪
經。一七日。二七日。或三七日。修齋行道。禮念
懺悔。即得上消天災。保鎮帝王。下禳毒害。以

度兆民。汝宜聽信。轉轉教人受持讀誦。青羅
真人叩頭再拜。上告。

天尊。伏願大慈。廣為宣說。是時
天尊即說十一曜大消災神呪。

九星都呪

九曜順行
元靈散開
上投朱景
騰身紫微

元始徘徊
流盼無窮
解滯豁懷
人間萬事

華精瑩明
降我光輝
得馭飛霞
令我先知

五星神呪

五星列照
木德致昌
鎮星四據
字錄帝房
出入冥無

煥明五方
熒惑消禍
家國利亨
乘飈散景
遊宴十方

水星却災
太白辟兵
名刊玉簡
飛騰太空
五雲浮蓋

招神攝風

役使萬靈

上衛仙翁

太陽真君神呪

東望扶桑宮

稽首朝鬱儀

太陽洞明景

寥寥何所思

令我拜金色

候天望英姿

皇華將玉女

臨軒降此時

太陰真君神呪

仰望顧八表

惟月孕陰精

中有太素皇

夫人駕綠輶

耀華光二極

混明照三清

懇懃求至道

五色下來迎

木星真君神呪

歲星垂木德 展轉耀東鄉 凌天姿潤澤
正色滉明皇 尋花歌浩漾 擲水詠芝房
經時頻禱祝 獲福自然長

火星真君神呪

芒角森龍鳳 威光叱十方 丹劉耀五夜

朱火焰三邊 晶明符正炁 劍戟煥兵權
攬槍應滅跡 字彗敢當前

金星真君神呪

太白凌清漢 騰霜耀素英 亭亭浮瑞彩
皎皎盛長庚 鋒高能禦寇 色潤每降兵

推窮符曆數 合道與長生

水星真君神呪

妙哉符五炁 彷彿見辰門

嵯峨當丑位

壬癸洞靈君 分輝凝皎潔

盼蠻赴思存

仙歌將舞蹈 良久下金天

土星真君神呪

高穹符戊巳 藏陸起重霄 五行尊暗曜
九土見光昭 甘石推留伏 陶巫箕沈寥
上仙垂雨露 伏地禮空搖
羅睺真君神呪

神首循黑道 冥冥超至靈 暗明期朔望
陽德晦陰精 高鎮黃幡闕 矛戟耀霜鈴
志心俟多福 稽首諷真經

計都真君神呪

霞暗表陰德 豹尾鎮星君 怒指摧山嶽

權雄暝太空 龍蛇生怪狀 變異忽昏朦
主人長壽福 禳應在恪恭

紫炁真君神呪

授制宗元帝 含精耀紫微 陰陽乘運極
幽顯閱靈機 玉輿登廣漢 金鈴步斗飛

四宿循周度 九土尊天威

月孛真君神呪

太陰光玉緯 精魄育羣生 青桂黃華輔
鬱羅保素靈 毛頭分怪狀 彗尾或潛經
舍次流灾福 齋修洞杳冥

三啓頌三首

妙哉三洞響 寥寥何鈴鈴 尋聲若無有
運之不見形 響音洞十方 聽之不聞聲

又頌曰

大道須人弘 遊心歸太空 朝禮運十方

昇度乘九龍 飄飄超三界 亦由雲中崇

又頌曰

吾師天中尊 超超無上皇 仰觀地維表
彷彿紫炎堂 巍巍玄都室 但見仙人房
天尊告青羅真人曰。此諸神呪。若能虔心誦

誦即得星辰順度。疾病消除。社稷安寧。人民
道泰。青羅真人稽首再拜。及諸仙衆聞說經
呪。皆大歡喜。作禮而退。於是青羅真人下傳
世間。推窮曆數。信受奉行。

元始天尊說十一曜大消災神呪經

太上玄靈北斗本命延生經

爾時太清天中大聖老君以永壽元年正月
七日在太清境上太清宮中觀見衆生億劫
漂沉周廻生死或居人道生在中華或生夷
狄之中或生蠻戎之內或富或貴或賤或貧
暫假因緣墮於地獄轉乖人道難復人身還
歸輪轉為無定故罪業牽纏魂繫陰司受苦
滿足人道將違生居畜獸之中或生禽虫之
屬轉乖人道難復人身如此沉淪不自知覺
為先世迷真之故受此輪廻我以哀憫之心

分身教化。化身下降。至於蜀都。地神湧出。扶一玉局而作高座。於是

太上昇玉局坐。授與天師真人北斗本命經訣。廣宣要法。作人舟船津梁。男女普濟衆生。使不失人路。

太上是時告天師曰。人身難得。中土難生。假使得生。正法難遇。多迷真道。多入邪宗。多縱罪根。多諸巧詐。多恣淫殺。多好群情。多愛貪瞋。多沉地獄。多失人身。如此等緣。衆生不悟。不知正道。迷惑者多。我今哀見此等衆生。故

垂法教。為說良緣。令使知道。知身性命。皆憑
道生。了悟此因。長生人道。種子不絕。世世為
人。不生無道之鄉。不斷人之根本。更能心修
正道。漸入仙宗。永離輪迴。超昇成道。我故示
汝妙法。令度天民。皈真知命。可以本命之日。

修齋設醮啓祝

北斗三官五帝。九府四司。薦福消災。奏章懃
顧。虔誠獻禮。種種香華。時新五果。像世威儀。
清淨堂宇。法天像地。吾科善教。請正一道士
一人。或一或二或三或五或七。或於觀宇。或

在家庭隨力建功。請行法事。於是功德深重。
不可具陳。念此

太上北斗真君名號。當得罪業消除。災衰洗。
隔壽資命。善果臻身。

具君應驗曰

家有北斗經

本命降真靈

家有北斗經

宅舍得安寧

家有北斗經

父母保長生

家有北斗經

諸厭化為塵

家有北斗經

萬邪自歸正

家有北斗經

營業得稱情

家有北斗經

闔門自康健

家有北斗經

子孫保榮盛

家有北斗經

五路自通達

家有北斗經

眾惡永消滅

家有北斗經

六畜保興生

家有北斗經

疾病得痊癒

家有北斗經

財物不虛耗

家有北斗經

橫事永不起

家有北斗經

長保亨利貞

道言。北辰在象。而衆星拱之。為造化之樞機。
作人神之主宰。宣威科戒。統御萬靈。判人間
善惡之期。勾陰府是非之目。五行共稟。七政
同科。有回死注生之功。有消灾度厄之力。上
至帝王。下及庶人。尊卑雖則殊塗。命分俱無

差別。凡夫在世。迷謬者多。不知身屬北斗。命由天府。有灾有患。不知解謝之門。延福延生。莫曉皈真之路。致使魂神被繫。禍患來纏。或重病不痊。或邪妖剋害。連年困薦。累歲屯遭。塚訟徵呼。先亡復連。或上天譴責。或下鬼所誣。若有此危厄。如何救解。急須投告北斗。醮謝真君。及轉真經。認本命真君。方獲安泰。以至康榮。更有深妙。不可盡述。北斗真形頂禮恭敬。呪曰。

天靈節榮

願保長生

太玄之一

守其真形

五藏神君

各保安寧

第一北斗貪狼太星君子生人屬之

第二北斗巨門元星君丑亥生人屬之

第三北斗祿存真星君寅戌生人屬之

第四北斗文曲紐星君卯酉生人屬之

第五北斗廉貞岡星君辰申生人屬之

第六北斗武曲紀星君巳未生人屬之

第七北斗破軍關星君午生人屬之

北斗左輔星君

北斗右弼星君

三台生我来

三台養我来

三台護我来

於是真形名號。不可得聞。凡有見聞。能持念者。皆道心深重。宿有善緣。得聞持誦。其功德力。莫可稱量。濟度存亡。增延福壽。巍巍功德。真聖祖宗。為性相之根本。若正信男女。值此真經。智慧性圓。道心開發。出群迷徑。入希夷。

門。皈奉真宗。達生榮界。於三元八節。本命生辰。北斗下日。嚴置壇場。轉經齋醮。依儀行道。其福無邊。世生不生。不違真聖。不入邪見。道言。凡人性命五體。悉屬本命星官之所主掌。本命神將。本宿星官。常垂蔭佑。主持人命。使保天年。凡俗無知。自身不悟。夫本命真聖。每歲六度降在人間。降日為本限期。可以消災懺罪。請福延生。持此真經。隨力章醮。福德增崇。其有本命限期將至。身自不知。不設醮筵。不修香火。此為輕生迷本。不愧人身。天司

奪祿減筭除年。致多天喪。如此之人。身謝之
後。淪沒三塗。漂諸六趣。生禽獸中。永失人身。
為本命人根本。明所報也。若本命之日。其有
男女。能修齋醮。善達天司。一世於本命限期。
開轉此經。廣陳供養。使三生長為男子身。富
貴聰明。人中殊勝。其有男女生身果薄。雖在
人中。貧窮下賤。縱知本命。無力修崇。可以酌
水獻花。冥心望北極。稽首禮拜。念本命真君
名號者。亦不虛過本命期限。皆得延生注福。
繫係人身。灾厄蠲除。獲福無量。天師歡喜踊

躍。作禮圍繞讚歎。難可得遇無上法橋。

道言。於是重告天師曰。世人罪福善惡。皆達天司。懺罪消災。莫越修奉。建齋設醮。種人善根。遇本命生辰。告身中元辰驛馬。削落三災九厄。保見今眷屬安寧。悔過虔恭。漸登妙

果。重立玄功。證虛無道。證虛無道。乃得聖智。
圓通聖智。圓通隱顯莫測。出有入無。逍遙雲
際。昇入金門。與聖合真。身超三界。永不輪轉。
壽量無窮。快樂自在。於是天師授得妙法。而
作是言。誓願流行。今傳善士。若有男女授持。
讀誦。我當與十戒仙官。所在擁護。迷誤之者。
值遇經訣。懷不信心。毀謗真文。如此之人。罪
根難滅。命沉六趣。永失人身。深可悲哀。自致
斯苦。凡有上士。於本命生辰。持讀是經。皆外
伏魔精。將安真性。功霑水陸。善及存亡。保而

敬之。非人勿示。永為身寶。福壽可稱。是經在
處。有南陵使者三千人。北斗真君七千神將。
本命靈官降駕。眾真悉來擁護。持經之人。常
持誦七元真君所屬尊號。善功圓滿。以降吉
祥。即說北斗呪曰。

北斗七真

天中大神

上朝金闕

下覆崑崙

調理綱紀

統制乾坤

貪狼巨門

祿存文曲

廉貞武曲

破軍輔星

大周天界

細入微塵

何灾不滅

何福不臻

玄黃正炁

來合我身

天罡所指

晝夜長輪

隔居小人

好道求靈

常見尊儀

願賜長生

高上玉皇

紫微帝君

三台生我來

三台養我來

三台護我來

道言。凡有男女。於本命生辰及諸齋日。清靜

身心。焚香持此真文。自認北極本命所屬星君。随心禱祝。善無不應。灾罪消除。志感萬聖。千真俱來衛護。此經尊重。是修真之通路。得道逍遙。皆因此經。證聖成真。皆因此經。出離生死。皆因此經。保護男女。皆因此經。保命延

年。皆得自在。此經若所在之處。千真敬禮。萬
聖護持。魔鬼潛消。精靈伏匿。世有灾殃。悉皆
消滅。凡有急難。可以焚香誦經。剋期安泰。於
是乃稱念。

北極救苦呪曰

大聖北斗七元君

能解三灾厄

大聖北斗七元君

能解四殺厄

大聖北斗七元君

能解五行厄

大聖北斗七元君

能解六害厄

大聖北斗七元君

能解七傷厄

大聖北斗七元君

能解八難厄

大聖北斗七元君

能解九星厄

大聖北斗七元君

能解夫妻厄

大聖北斗七元君

能解男女厄

大聖北斗七元君

能解產生厄

大聖北斗七元君
大聖北斗七元君
大聖北斗七元君
大聖北斗七元君
大聖北斗七元君
大聖北斗七元君
大聖北斗七元君
大聖北斗七元君

國家圖書館, NATIONAL CENTRAL LIBRARY, TAIWAN, R.O.C

能解伏連厄
能解疫癘厄
能解疾病厄
能解精邪厄
能解帛狼厄
能解虫蛇厄
能解劫賊厄
能解枷棒厄
能解橫死厄
能解咒誓厄

大聖北斗七元君

能解天羅厄

大聖北斗七元君

能解地網厄

於是七元君。大聖善通靈。濟度諸厄難。超出
苦衆生。若有急告者。持誦保安寧。盡憑生百
福。咸契於五星。三魂得安健。邪魅永能停。五
方降真炁。萬福自来并。長生超八難。皆由奉
此經。生生身自在。世世保心清。善似光中影。
應如谷裏聲。三元神共護。萬聖眼同明。無灾
亦無障。永保道心寧。

道言。說經將畢。龍鶴天仙來迎。

老君還於玉京。是時老君重告天師曰。可以
宣揚正教。普濟世人。福利無邊。永霑勝善。是
時天師再拜老君。流傳此經於世。廣垂濟度。
作人戒慎之焉。

上
云靈北斗本命延生經

洞玄靈寶自然九天生神章經

三寶大有金書

天寶君者。則大洞之尊神。天寶丈人。則天寶君之祖炁也。丈人是混洞大無元。高上玉虛之炁。九萬九千九百九十億萬炁。後至龍漢元年。化生天寶君。出書時。號高上大有玉清宮。

靈寶君者。則洞玄之尊神。靈寶丈人。則靈寶君之祖炁也。丈人是赤混太無元。玄上紫虛之炁。九萬九千九百九十九萬炁。後至龍漢

開圖化生靈寶君。經一劫。至赤明元年。出書度人時。號上清玄都玉京七寶紫微宮。

神寶君者。則洞神之尊神。神寶丈人。則神寶君之祖炁也。丈人是冥寂玄通元。無上清虛之炁。九萬九千九百九十萬炁。後至赤明元年。化生神寶君。經二劫。至上皇元年。出書時。號三皇洞神太清太極宮。

此三號雖年殊號異。本同一也。分為玄元始三炁而治。三寶皆三炁之尊神。號生三炁。三號合生九炁。九炁出乎太空之先。隱乎空洞。

之中。無光無像。無形無名。無色無緒。無音無聲。道運御世。開闢玄通。三色混沌。乍存乍亡。運推數極。三炁開光。炁清高澄。積陽成天。炁結凝滓。積滯成地。九炁列正。日月星宿。陰陽五行。人民品物。並受生成。天地萬化。自非三元所育。九炁所導。莫能生也。三炁為天地之尊。九炁為萬物之根。故三合成德。天地之極也。人之受生於胞胎之中。三元育養。九炁結形。故九月神布。炁滿能聲。聲尚神具。九天稱慶。太一執符。帝君品命。主錄勒籍。司命定筭。

五帝監生。聖母衛房。天神地祇。三界備守。九天司馬在庭。東向讀九天生神寶章。九過男則萬神唱恭。女則萬神唱奉。男則司命敬諾。女則司命敬順。於是而生。九天司馬不下命章。不唱恭諾。終不生也。夫人得還生於

人道濯形太陽驚天駭地貴亦難勝天真地
神三界齊臨亦不輕也當生之時亦不為陋
也所以能愛其形保其神貴其炁固其根終
不死壞而得神仙骨肉同飛上登三清是與
三炁合德九炁齊并也但人得生而自不能
尊其炁貴其形寶其命愛其神自取死壞離
其本真耳

九天生神章乃三洞飛玄之炁三合成音結
成靈文混合百神隱韻內名生炁結形自然
之章天寶誦之以開天地之光靈寶誦之以

開九幽長夜之魂神寶誦之以制萬靈。太一誦之以具身神。帝君誦之以結形。九天誦之以生人。學士誦之以昇天。鬼靈聞之以昇遷。凡夫聞之以長存。幽魂聞之以開度。枯朽聞之以發烟。嬰孩聞之以能言。死骸聞之以還人。三寶神奧萬品生根。故非鬼神所知。凡夫所聞也。夫學上道希慕神仙。及得尸解。滅度轉輪。終歸仙道。形與神同。不相遠離。俱入道真。而無此文。則胞胎結滯。死炁固根。真景不守。生炁無津。九戶閹塞。體不生神。徒受一形。

若寄炁而行。學得此法。可坐致自然。三寶尊
重。九天至真。祕之太有九重金格。紫陽玉臺。
自非天地一開。其文不出。元始禁書。非鬼神
所聞。竊之者。風刀萬劫。魂死無生。依科侍奉。
形神同仙。三元宮中。宿有金名紫字。刻書來
生。應為三清神仙之人。當得此文。有其緣會。
當賣金寶。奉師効心。依科遵奉。閉心奉行。慎
勿輕泄。風刀考身。修行之法。千日長齋。不關
人事。諸塵漏盡。夷心默念。清香執戒。入室東
向。扣齒九通。調聲正炁。誦詠寶章。誦之一過。

聲聞九天。誦之二過。天地設恭。誦之三過。三界禮房。誦之四過。天王降仙。誦之五過。五帝朝真。誦之六過。魔王束身。誦之七過。星宿停關。誦之八過。幽夜光明。誦之九過。諸天下臨。一切神靈。莫不衛軒。一過徹天。胞原宣通。二

過響地。胎結解根。三過神禮。魂門煉仙。四過
天王降仙。魄戶閉關。五過五帝朝真。藏府清
涼。六過魔王伏諾。胃管生津。七過星宿朗明。
孔竅開聰。八過幽夜顯光。三部八景。整具形
神。九過諸天下臨。三關五藏六府九宮。金樓
玉室。十二重門。紫戶玉閣。三萬六千關節。根
原本始。一時生神。九過為一遍。一遍周竟。三
界舉名。五帝友別。稱為真人。十遍通炁。制御
萬靈。魔王保舉。列上諸天。百徧通神。坐致自
然。太乙度符。元君受生。千徧通靈。坐在立亡。

仙童玉女。役使東西。萬徧道備。馳騁龍駕。白
日登晨。

元始天尊。時靜處閒居。偃息雲宮黃房之內。
七寶幃中。熙夷養素。空碧煉真。耽咀洞慧。俯
研生神。理微太混。嘯朗九天。是時飛天大聖。
無極神王。玉輔上宰。四協侍宸。清齋建節。侍
在側焉。憑瓊顏而妙感。仰靈眸而開襟。竊神
章而踴躍。餐天音而蒙生。敢乘機而悟會。冒
靈眄而披心。於是飛天大聖。無極神王。前進
作禮。稽首而言。上白。

天尊賤臣幸會得仰侍靈軒不以短狹叨濯
冥津重悟凝玄位登神王總御生死領括天
仙賞監七覺遠覽遐方雍觀上宰對司侍宸
方當乘機應會履九太陽洞理陰符撫掌兆
民大運將期數終甲申洪流蕩穢凶災弥天
三官鼓筆料別種人考筭功過善惡當分自
赤明以來至上皇元年依元陽玉匱受度者
應二十四萬人開皇以後數至甲申諸天選
敘仙曹空廢官僚不充游散職司皆應選人
依元陽玉曆當於三代更料有心積善建功

為三界所舉。五帝所保。名在上天者。取十萬人以充其任。又當別舉一十二萬人以充儲官。如此之例。或以宿名玄圖。或以骨像合仙。或以臧度。因緣轉輪。或以篤好三寶。善功徹天。或供養師寶。為三官所稱。或修齋奉戒。功

德積感。或散施財寶。建立道堂。或救卹窮乏。濟度天人。或為三師建功。充足天官。有名考算簿錄。三官相應。皆逆注種名。上下有別。毫分無遺。又九幽之府。被東華青宮九龍符命。使拔九幽玉賈男女死魂。宿名有善。功德滿足。應受開度者。取三十二萬人。以充甲申。驅除之後。開大有之民。當此之時。生死交會。善惡分判。得過者。真為樂哉。然三官相切。文墨紛紜。龍門受會。鳥母替仙。萬聖顯駕。晝夜無閑。功過平等。使生死無偏。此之昏閑。亦臣之

憂矣。大期既切。觸事闕替。恒恐一旦受羅公
門。伏聞

天尊造大慈之化。垂憐蒼生。開九天之奧。以
濟兆民。明科有禁戒。非賤臣所可參聞。然大
數有期。甲申垂終。運度促急。大法宜行。使有
心者得於考筭之中。聞於法音。開示於視聽。
勸化於未悟者也。緣茲上陳。懼觸天顏。願見
哀閔。賜所未聞。於是
天尊撫几高抗。凝神遐想。仰誦洞章。嘯詠琳
琅。良久忽然歎曰。上範虛漠。理微大幽。道達

重玄炁冠神霄。至極難言。妙亦難超。子既司
帝位。受任神王。飛天翼於瓊闕。四宰輔於明
輪。遐眎極覽。領綜無窮。雍和萬化。撫料蒼生。
今大運啓期。三五告辰。百六應機。陽九激揚。
洪泉鼓波。萬災厲天。四宮選舉。以光種民。三
代昏亂。善惡宜分。子當勞心兆庶。疲於三官。
興廢之際。事須開能。今以相委。其勉之焉。
寶書妙重。九天靈音。施於上聖。非鬼神所聞。
明真有格。四萬劫一行。今冒禁相付。子祕之
矣。慎勿輕傳。登命九天司馬侍仙玉郎。開紫

陽玉笈雲錦之囊。出九天生神玉章。四輔列位。五老監真。太一命辰。

玉帝唱盟。一依俯仰。明真具典。南向長跪。以付飛天無極神王。法事既畢。諸天復位。

天尊重告飛天神王。此九天之章。乃三洞飛

玄之炁三會成音。結成真文。混合百神。隱韻
內名。故太一戒觀。攝生十方。領會洞虛。啓誓
丹青。自無億劫因緣。宿名帝圖。不得參見。得
盼篇目。九祖同仙。當採擇其人。應為仙者。七
百年中。清齋千日。齋金繒擔。心依盟以傳。慎
之則享祚。漏之則禍臻。享祚則福延。九祖德
重山海。招禍則考流億劫。痛於毒湯。風刀相
刑。可不慎之焉。

始青清微天寶章

元始洞空無三炁精。上門紫容觀太空。四

明植靈根妙化教東瓊三翩起西崑號應
九玄清五華帶錦雲離羅煥神燈七精耀
北玄飄飄上清畿奕奕帝乙尊落落高上
章羽童何紛紛流香本無色洞入萬仙羣
左迴三流劫右轉九天關金華纓玉童八
風舞空輪四時無停機青白早明分九九
改劫運三三度一春天地有終會祕激歸
在翻洞明正一法嚴修六天文太平返空
無奉翊後聖君
元白禹餘靈寶章

靈風起西門錦雲生東瓊三炁煥玉洲流
香乘東輕玉華披風散倏忽朗九清騫林
耀朱日黃水逐月生中有採芝童衣羽戴
飛青鸞景萬領風逍遙宴綠輶總御九空
輪運開萬稽程左命三天文右攝六天兵
檢炁返空洞六度應運傾劫運自有會誰
測敗與成弘波輪靈罡六合無遺形白屍
漂長流孤魂因復靈悲此去來際乃覺正
法明至學加精修東華結瓊名欣有白簡
人相與樂太平

玄黃太赤神寶章

洞闢運天罡五炁輪三微紫戶吐瓊簡金
門納神暉八會交真風晃朗重名開天際
九清外落落高神迴三色返空無四候應
玉畿河侯已鼓筆五行潛相推六度無終

劫運極炁歸萬魔羅天布群兇竟吐威
兆民負災衝積屍令人悲妙哉正法文理
劫明不衰至時奉相迎契在九天飛與爾
期太平放心無翮飛

鬱單無量天生神章第一。

帝真胞命元元一黃演之炁。

混合空洞炁飛爽浮幽寥延康無期劫眇眇
離本條苦魂沉九夜乘晨希陽翹大有通玄
戶鬱單降晨霄黃雲凝靈府陰陽炁象交胞
元結長命惡根應化消桃康合精延二帝秀

玉飄灑胞命門精鍊神不凋。九天命靈章。
生神神自超。元君遏死戶。司馬誦洞謠。一唱
萬真和。九遍諸天朝。稽首恭劫年。慶此榮舊
苗。上上禪善無量壽。天生神章第二。
帝真胎命元洞冥紫戶之炁。

無量結紫戶。炁尊天中王。開度飛玄爽。變化
輪空洞。故根離昔愛。緣本思舊宗。幽夜淪遐
劫。對盡大運通。帝真始明精。號曰字元陽。嬰
兒史伯華。結胎守黃房。斬根斷死戶。熙願養
嬰童。禪善道靈炁。玄哺飛天芳。華景秀玉質。

精鍊自成容。務玄育尚生。羅列備明堂。太虛
感靈會。命我生神章。一唱動九玄。二誦天地
通。混合自相和。九徧成人功。大聖慶元吉。散
華禮太空。諸天並歡悅。一切稽首恭。

梵監須延天生神章第三。

帝真魂命元長靈明仙之炁。

須延總三雲。玄元始炁分。落落大範布。華景
翠玉尊。明梵飛玄景。開度長夜魂。游爽赴期
歸。炁炁反故根。太帝號陽堂。字曰八靈君。九
開回祿道。胎炁生上元。陵梵度命籍。太一輔

精延泥丸敷帝席。三部八景分。魂生攝游炁。
九轉自成仙。琅琅九天音。玉章生萬神。三遍
列正位。炁參八辰門。玄關遏死戶。靈鎮津液
源。應會感靈數。明道潛回輪。慶此嬰兒蛻。稽
首讚洞文。

寂然堯術天生神章第四。

帝真魄命元陽尸冥演由之炁。

寂然無色宗堯術抗大羅靈化四景分萬條
翠珠霞游魄不顧返一逝洞羣魔神公攝游
炁飄飄鍊素華榮秀春劫期乘運應靈圖空
洞生神章瓊音逸九霞一唱萬真會騫奩合
成家九轉景靈備鬱鬱曜玉葩堯術開大有
一慶享祚多上聖回帝駕嬰兒歛以歌不勝
良辰會一切稽首和。

波羅尼密不驕樂天生神章第五。

帝真藏府命元五仙中靈之炁。

翻翻五帝駕飄飄玄上門。游步黃華野迴靈
驕樂端採集飛空景。舊爽多不存太微迴黃
旗無英命靈播攝召長夜府開度受生魂公
子輔黃寧總錄具形神玉章洞幽靈五轉天
地分炁鍊元藏府紫戶自生仙數周衆真會
啓陽應感繁玉女灌五香聖母慶萬年三界
並歡樂稽首禮天尊。

洞元化應聲天生神章第六。

帝真靈府命元高真冲融之炁。

應聲無色界。霄映冠十方。回化輪無影。冥期
趣道場。靈駕不待轡。朗然生神章。空洞諒無
崖。玄爽亦為強。鍊胎反本初。長乘飛玄梁。蘄
畜喪天真。散思候履常。斬伐胞樹滯。心游超
上京。願會既玄玄。悟我理兼忘。介福九天端
交禮。地辰良。混化歸元一。高結元始王。稽首
儔靈運。長謝囂塵張。

靈化梵輔天生神章第七。

帝真神府命元。高仙洞笈之炁。

玄會統無崖。混炁歸梵輔。務猷運靈化。潛推

無寒暑。乘數搆貞條。振袂拂輕羽。瓊房有妙
韻。汎登高神所。圓輪無停映。真仙森列序。上
上霄衢邈。洞元深萬巨。秀葉翳翠霞。停蔭清
泠渚。遨翫怡五神。繁想嘯明侶。五難緣理去。
冲心自怡虔。爽魂隨本根。亶亶空中佇。七誦

重關開豁滯非神武。運通由中發。高唱稽首
舉。

高虛清明天生神章第八。

帝真華府命元真靈化凝之炁。

清明重霄上。合期慶雲際。玉章散冲心。孤景

要靈會。煥落景霞布。神衿靡不邁。玉條流逸
響。從容虛妙話。靈音振空洞。九玄離幽裔。感
賞無凝滯。去留如解帶。明識生神章。高游無
終敗。玄景曜雲衢。跡超神方外。應感無方圓。
聊以運四大。研心稽首誦。衆聖共稱快。

無想無結無愛天生神章第九。

帝真元府命元自然玄照之炁。

無結固無情。玄玄虛中澄輪化無方序。數來亦叵乘。誰云無色平。峨峨多丘陵。冥心縱一往。高期清神徵。良遇非年歲。劫數安可稱。浮爽緣故條。反胎自有恒。靈感洞太虛。飛步霄上冰。津趣鼓萬流。潛凝真神登。無愛故無憂。高觀稽首昇。

太極真人二頌

大道雖無心。可以有情求。

佇駕空洞中。

回盼翳滄流 淨明三界外 蕭蕭玉京游
自無玄挺運 誰能悟冥趣 落落天漢澄
俯仰即虛柔 七玄散幽夜 反胎順沉浮
冥期苟潛凝 陽九無娛憂 覩此去來會
時復為淹留 外身而身存 真仙會良儔
亶亶玄中趣 湛湛清漢波 代謝若循環
椿木不改柯 靜心念至真 隨運順離羅
感應理常通 神適逮自徂 淡游初無際
繁想洞九遐 飛根散玄葉 理反非有他
常能誦玉章 玄音徹霄霞 甲申洪災至

控翽王母家

永享無終紀

豈知年劫多

洞玄靈寶自然九天生神章經

元始天尊說北方真武妙經

仰啓玄天大聖者

北方壬癸至靈神

金闕真尊應化身

無上將軍號真武

威容赫奕太陰君

列宿虛危分秀炁

雙睛掣電伏羣魔

萬騎如雲威九地

紫袍金帶佩神鋒

蒼龜巨蛇捧聖足

六丁玉女左右隨

八殺將軍前後衛

消災降福不思議

歸命一心今奉禮

爾時

元始天尊於龍漢元年七月十五日。於八景

天宮上元之殿安祥五雲之座與三十六天帝十極真人無量飛天大神玉童玉女侍衛左右一時同會鼓動法音天樂自響大衆欣然咸聽

天尊說無上至真妙法。是時上元天宮東北方大震七聲。天門忽開。下觀世界。乃有黑毒血光穢雜之炁。幽幽冥冥。從人間東北方直上衝天。盤結不散。大衆咸驚。默然不敢議問。時會中有一真人。名曰妙行。威德充備。諸天尊仰。越班而出。執簡長跪。上白。

天尊曰。况此境清靜。太陽道境。何得有此黑
毒之炁。盤結衝上。是何異因。唯願

天尊至聖。為衆宣說。絕其疑慮。

天尊告曰。汝等妙行。能為衆生。啟問。是由。汝
當復坐。靜默安神。吾當為說。

天尊曰。下元生人。皆稟清靜。氤氲真一之形。
悉備三萬六千神炁。扶衛其身。今已陰陽數
盡。劫運將終。魔鬼流行。信從邪道。不省本源。
諂求餘福。昏迷沉亂。不忠不孝。不義不仁。好
樂邪神。禱祭魔法。今為六天魔鬼。狂所傷害。

或老或少。或男或女。未盡天年。橫被傷殺。本
非死期。魂無可托。鬼毒流盛。死魂不散。怨怒
上衝。盤結惡炁。汝當省知。於是妙行真人與
諸大衆聞是說已。心大驚怖。欲請
天尊威光。暫降下方。收除魔鬼。救度生人。拔

濟幽魂。去離邪橫。大衆懷疑。未敢。

天尊告曰。不勞吾威神。此去北方。自有大神
將。號曰真武。部衆勇猛。極能降伏邪道。收斬
妖魔。真人上白。

天尊曰。不審此位神將。生居天界。修何道德。
為於神將。

天尊告曰。昔有淨樂國王。與善勝皇后。夢吞
日光。覺而有娠。懷胎十四箇月。於開皇元年。
甲辰之歲。三月建辰初三日午時。誕於王宮。
生而神靈。長而勇猛。不統王位。唯務修行。輔

助

玉帝誓斷天下妖魔。救護羣品。日夜於王宮中發此誓願。父王不能禁制。遂捨家辭父母。入武當山中修道四十二年。功成果滿。白日登天。

玉帝聞其勇猛。勅鎮北方。統攝真武之位。以斷天下妖邪。真人上白。

天尊曰。如何得此神將。入於下方。收除魔鬼。救度羣生。免遭橫死。日有所益。伏願大慈。

天尊遂其所請。天尊乃勅右侍玉童。馳詔真

符一道。逕往北方。召其
真武神將。其神蒙召。部領神衆。逕往
天尊前。長跪。臣已奉
玉帝勅命。位鎮北方。今日何緣得覩
慈顏。特蒙符召。

天尊告曰。吾於上元宮中。大會說法。忽下方
黑毒怨炁。衝上天界。大衆咸驚。汝宜往彼收
斷妖魔。拔濟魂爽。

真武神將敬奉

天尊教勅。乃披髮跣足。踏騰蛇八卦神龜。部

領三十萬神將。六丁六甲。五雷神兵。巨虬獅子。毒龍猛獸。前後導從。齊到下方。七日之中。天下妖魔一時收斂。人鬼分離。冤魂解散。生人安泰。國土清平。

真武神將與諸部衆還歸上元宮中。朝見

天尊曰。昨奉教命。往下方收斬妖魔。仗
慈尊力。乃於七日之內。天下邪鬼。並皆清蕩。
天尊曰。善哉。汝等諸神。得無勞乎。於是
真武神將。乃交乾布斗。魁罡激拍。上佐天關。
而作呪曰。

太陰化生	水位之精	虛危上應
龜蛇合形	周行六合	威攝萬靈
無幽不察	無顛不成	劫終劫始
翦伐魔精	救護羣品	家國咸寧
數終末甲	妖氣流行	上帝有勅

吾固降靈
化育黎兆
欲來見形
急急如律令

奉禮呪曰

闡揚正法
協贊中興
吾目一視

蕩邪辟兵
敢有小鬼
五嶽摧傾

太初太易
孰辨輕清
天得以健
物得以萌
三才之內

無象無形
吾於混沌
地得以寧
邪得以正
萬類咸亨

莫知重濁
分其昏明
民得以養
神得以靈
大朴既散

仁義乃興

禮樂既作

姦邪斯行

六誼或失

四民有爭

上不寬恕

下不忠貞

或魔或鬼

或妖或精

恣橫荼毒

干擾生民

全家疾患

累歲官刑

財物耗散

骨肉伶仃

性命枉逝

災禍相縈

穢雜之炁

上達天庭

天尊有命

令與安平

有妖皆翦

無鬼不烹

瘟疫之吏

束首伏膺

鬼精滅爽

邪魔摧傾

吾有十萬卒

五千萬兵

天上天下

從吾降升
惡吾者辱
非吾者薨
急急如律令

又呪曰

拒吾者滅
敬吾者榮
吾有此令

奉吾者生
禮吾者壽
人鬼咸聽

北方玄天

杳杳神君

億千變化

玄武靈真

騰天倒地

驅雷奔雲

隊仗千萬

掃蕩妖氛

雷公侍從

玉女將軍

鬼神降伏

龍虎潛奔

威震五嶽

萬靈咸遵

鳴鐘擊鼓

游行乾坤

收捕逆鬼

破碎魔軍

除邪輔正

道炁常臻

急急如律令

天尊告真武曰。自今後凡遇甲子庚申。每月
三七日。宜下人間。受人之醮祭。察人之善惡。
修學功過。年命長短。可依吾教。供養轉經。衆

真來降。魔精消伏。斷滅不祥。過去超生。九幽
息對。見存獲慶。天下和平。爾時妙行真人與
諸天帝。無量飛天神王。真仙大衆。聞說莫不
歡喜踴躍。一時作禮。讚歎功德。我等今日蒙
大法利益。請於人世。救護衆生。令得免三災
患難。各各受持。稽首奉行。真武神將再奉
天尊勅。永鎮北方。奉辭而退。

卅

元始天尊說北方真武妙經

梵炁赤書煥發六百六十八真文因混沌赤
文而開九霄紀元洞玉曆而分五劫天經地
緯魏乎造化之宗樞陰機陽卓尔雷霆之祖
大悲大願大聖大慈王宸道君靈寶天尊

太清號

天

隨方設教歷劫度人為皇者師帝者師王者
師假名易號立天之道地之道人之道隱聖
顯凡總千二百之官君包萬億重之梵然化
行今古著道德凡五千言主握陰陽命雷霆
用九五數大悲大願大聖大慈太上老君道
德天尊

彌羅號

太上彌羅無上天妙有玄真境渺渺紫金闕
太微玉清宮無極無上聖廓落法光明寂寂
號無宗玄範總十方湛寂真常道恢漠大神

通昊天玉皇大天尊玄穹高上帝

天皇號

紫微宸極勾陳天宮九光寶苑之中五炁玄
都之上體元皇而佐司玄化總兩極而共理
三才主持兵革之權衡廣推大德統御星辰
之躔次毋失常經上象巍峩真元恢漠大悲
大願大聖大慈勾陳上宮天皇上帝

星主號

大羅天闕紫微星宮尊居北極之高位正中
天之上佛號金輪熾盛道稱玉斗玄尊璇璣

玉衡齊七政總天經地緯日月星宿約四時
行黃道紫垣萬象宗師諸天統御大悲大願
大聖大慈萬星教主無極元皇中天紫微北
極大帝

后土號

九華玉闕七寶皇房承天稟命之期主陰執
陽之柄道推尊而含弘光大德數畜於柔順
利貞效法昊天根本育坤元之美流形品物
生成施母道之仁嶽瀆是依山川咸伏大悲
大願大聖大慈承天效法后土皇地祇

神霄號

高上神霄府凝神煥照宮會元始祖炁以分
真應妙道虛無而開化位乎九霄之上統理
諸天總乎十極之中宰制萬化宣金符而垂
光濟苦施惠澤而覆育兆民恩溥乾元仁敷

浩劫大悲大願大聖大慈玉清真王南極長
生大帝統天元聖天尊

救苦號

青華長樂界東極妙嚴宮七寶芳囂林九色
蓮花座萬真環拱內百億瑞光中上清靈寶
尊應化玄元始浩劫垂慈濟大千甘露門妙
道真身紫金瑞相隨機赴感誓願無邊大聖
大慈大悲大願十方化號普度衆生億億劫
中度人無量尋聲赴感太乙救苦天尊青玄
上帝

普化號

九天應元府無上玉清王化形而滿十方談
道而趺九鳳三十六天之上閱寶笈考瓊書
千五百劫之先位正真權大化手舉金光如
意宣說玉樞寶經不順化作微塵發號疾如
風火以清靜心而弘大願以智慧力而伏諸
魔總司五雷運心三界羣生父萬靈師大聖
大慈至皇至道九天應元雷聲普化天尊

斗母號

西天竺國大智光中真空妙相法王師無上

玄元天母主金光燦處日月潛輝寶杵旋時
鬼神失色顯靈蹤於塵世衛聖駕於閭浮衆
生有難若稱名大士尋聲來救苦大悲大願
大聖大慈聖德巨光天后摩利支天大聖

三官誥

唯三聖人乃一太極普受浩劫家之命鼎膺
無量品之褒紫微清虛洞陰總領功過賜福
赦罪解厄溥濟存亡道冠諸天恩覃三界大
悲大願大聖大慈三元三品三官大帝三官
九府應感天尊

玄天誥

混元六天傳法教主修真悟道濟度羣迷普
為衆生消除灾障八十二化三教祖師大慈
大悲救苦救難三元都總管九天遊奕使左
天罡北極右垣大將軍鎮天助順真武靈應

玄天誥

四

福德衍慶仁慈正烈協運真君治世福神玉
虛師相玄天上帝金闕化身蕩魔天尊

祖天師誥

本來南土上沔蜀都先獲黃帝九鼎之丹書
後事老君兩度於玉局千軸得修真之要一
時成吐納之功法籙全成受盟威品而結璘
訣正邪兩辯奪福庭治而化醺泉德就大丹
道齊七政大悲大願大聖大慈三天扶教輔
玄體道大法天師雷霆都省泰玄上相都天
大法主正一冲玄神化靜應顯佑真君六合

無窮高明大帝降魔護道天尊

葛仙公誥

天台得道閣皂成真昔受東華復傳西蜀詔
命玉京金闕位登太極仙班慈憐拯拔於沉
淪恩念普資於苦壘葛天氏遺風顯著勾漏
令丹砂具存括蒼任遊羅浮乃止脩間玉笥
修理金書大悲大願大聖大慈太上玉京東
吳太極左宮仙公雷霆玄省天機內相玉虛
紫靈普化玄靜常道冲應孚佑真君垂恩廣
救慈悲大帝度人無量天尊

許真君誥

混元始祖。一炁分真。多劫之前。積修至道。勤苦備悉。經緯逾深。萬法千門。罔不斯歷。救災拔難。除害蕩妖。功濟生靈。名高玉籍。衆真推仰。宜有甄陞。大悲大願。大孝大仁。九州都仙。太史高明大使。雷霆泰省。天樞伏魔上相。至道玄應神功妙濟掌九天司職。太乙定命注生真君。三天按察都檢校。普奏諫議大夫。天監大帝。度人祖師。淨明普化天尊。

梓潼誥

不驕帝境玉真慶宮現九十八化之行藏顯
億千萬種之神異飛鸞開化於在在如意救
劫以生生至孝至仁功存乎儒道釋教不驕
不樂職盡乎天地水官功德難量威靈莫測
大悲大願大聖大慈九天輔元開化主宰司

祿職貢舉真君七曲靈應保德弘仁大帝談
經演教消劫行化更生永命天尊

侍宸誥

高上神霄玉清雷府光分一炁鍾秀君峯道
運五行侍宸徽廟掌中雷雨救旱消災拍顧
陰晴安邦護國功齊億劫教法祖師德濟群
迷衆生慈父冲虛通妙靈慧真君

辛天君誥

高上碧霄上清華王東極注生青華大帝南
昌火府通明猛吏陽晶鍊度執法真人分權

定衡真王玄都玉府太極先天冲玄上吏太
乙木郎光天都元帥九天考較使司元儲福
定命真君鐵筆注律大神光寂通天演法大
元帥掌風雲雷雨電霜雪雹銀牙耀目提點
三界三十六天雷霆大都督青帝天君元始
一炁節制萬靈太乙五雷判府天尊

鄧天君誥

高上神霄玉清真王南極長生朱陵大帝太
陽九龍皇君南昌上宮受鍊真人至真霹靂
大仙玄都九嶷九夷蓬萊滄水使者上清三


境都元帥九天採訪使應元保運妙化真君
歛火律令大神光妙橫天演真大元帥掌行
風催雨誅邪破廟祛諸潭洞總統三元八十
一天雷霆都總管炎帝天君元始祖劫一炁
分真太乙雷聲普化天尊

張天君誥

高上神霄玉清真王上清混元真宰玉府飛
天捷疾神王奏事提察妖魔使者伐惡報應
神君掌勅命令霹靂大神三界通明太使統
轄雷部大將軍主領雷霆副元帥九天副玄

雷聲普化天尊

諸聖真誥



國家圖書館, NATIONAL CENTRAL LIBRARY, TAIWAN, R.O.C.

太上洞玄靈寶救苦妙經

爾時

救苦天尊徧滿十方界。常以威神力。救拔諸
衆生。得離於迷塗。衆生不知覺。如盲見日月。
我本太無中。拔領無邊際。慶雲開生門。祥烟
塞死戶。初發玄元始。以通祥感機。救一切罪。
度一切厄。渺渺超仙源。蕩蕩自然清。皆承大
道力。以伏諸魔精。空中何灼灼。名曰泥丸仙。
紫雲覆黃老。是名三寶君。還將上天炁。以制
九天魂。救苦諸妙神。善見救苦時。天上混無

分天炁歸一身。皆成自然人。自然有別體。本在空洞中。空洞跡非跡。徧體皆虛空。第一委炁立。第二順炁生。第三成萬法。第四生光明。天上三十六。地下三十六。太玄無邊際。妙哉太洞經。歸命太上尊。能消一切罪。

東方玉寶皇上天尊 南方玄真萬福天尊
西方太妙至極天尊 北方玄上玉晨天尊
東北方度仙上聖天尊 東南方好生度命天尊
西南方太靈虛皇天尊 西北方無量大華天尊
上方玉虛明皇天尊 下方真皇洞神天尊

道言十方諸天尊其數如沙塵化形十方界
普濟度天人委炁聚功德同聲救罪人罪人
實可哀我今說妙經念誦無休息歸身不暫
停天堂享大福地獄無苦聲火翳成清署劍
樹化為騫上登朱陵府下入開光門超度三

界難逢上元始天於是飛天神王無鞅數衆
瞻仰

尊顏而作頌曰

天尊說經教接引於浮生勤修學無為
悟真道自成不迷亦不荒無我亦無名

朗詠罪福句 萬遍心垢清
爾時飛天神王及諸仙衆說是頌畢稽首
天尊奉辭而退

太上洞玄靈寶救苦妙經

元始天尊說生天得道真經

爾時

元始天尊在大羅天上玉京山中為諸天仙
衆說此生天得道真經告諸仙曰。吾今為汝
略啓身心明宣道要。十方得道神仙皆從此
經修行而通微奧。善男子善女人。依憑齋戒
作是津梁。一切有為顯諸真路。體此法相。乃
可受持。能屏衆緣。永除染著。外想不入。內想
不出。於正念中。乃得五藏清涼。六府調泰。三
百六十骨節之間。有諸滯礙。十惡之業。百八

十煩惱之業。衆苦罪源。悉皆除蕩。即引太和
真炁。注潤身田。五藏六府。心目內觀。真炁所
有。清淨光明。虛白朗曜。杳杳冥冥。內外無事。
昏昏默默。正達無為。古今常存。總持靜念。從
茲解悟。道力資扶。法藥相助。仍節飲食。驅遣
鬼尸。安寐六根。靜照八識。空其五蘊。證妙三
元。得道成真。自然昇度。爾時諸天仙衆。上白
天尊言。自從無始以來。至于今日。未聞如是
大乘經典。我等緣茲幸會。廣及一切。道果圓
明。而說偈曰。

杳杳冥冥清靜道
昏昏默默太虛蹤
體性湛然無所住
色心都寂一真宗

元始天尊說生天得道真經

太上老君說五斗金章受生經
爾時

太上老君在太清境上。大赤天中。黃金殿內。
召五老帝君。及東斗注算君。南斗上生君。西
斗記名君。北斗落死君。中斗總監君。九天生

神君。九天注生君。九天注祿君。九天掌籍掌
筭君。九天財庫祿庫君。九天消災散禍君。九
天聖母。九天太乙元君。九天監生大神。北斗
七元星君。南斗六司星君。本命元辰建生星
斗君。各隨本部功曹靈官。金童玉女。無量聖

太上玄微黃帝內經
卷之八
是經

衆一時同會稽首禮拜燒香散花步虛旋繞
長跪座前諦聽法言

太上老君廣宣要妙告示五方五老一切聖
衆曰吾昔於混沌之中天地未分元化體一
布氣十方成就萬象生天生地負陰抱陽陽

氣上昇化生諸天陰氣下降化生諸地陽之
餘氣化為男子陰之餘氣化為女人陰陽二
氣混合自然生生化化乃有人倫既有人倫
宿命因緣有善有惡有長有短有貴有賤有
富有貧善惡之報如影逐形如響應聲作善

善應作惡惡成種。蘭得香。種粟得糧。為善降
祥。為惡降殃。一切因緣。皆由福業。且人生下
土。命係

上天。人之生也。頂天履地。有陰有陽。各有五
行正氣。各有五斗所管。本命元辰。十二相屬。

且甲乙生人。東斗注生。丙丁生人。南斗注生。
戊己生人。中斗注生。庚辛生人。西斗注生。壬
癸生人。北斗注生。注生之時。各稟五行真炁。
真氣混合。結秀成胎。受胎十月。周回十方。十
方生氣。包羅元始。杳杳冥冥。其中有精。恍恍

惚惚其中有物。視不見我。聽不得聞。離種種
邊。名為妙道。妙道在人。不可輕失。失之甚易。
保之甚難。多迷真道。多逐邪源。多好媼殺。多
好貪嗔。多沉地獄。多失人身。受生之時。五斗
星君。九天聖衆。注生注祿。注富注貧。注長注
短。注吉注凶。皆由衆生自作自受。若人在世
之日。心崇大道。供養
天尊。孝順父母。和同六親。不嫉不妬。不貪不
媼。或持齋戒。或作善緣。或受三戒。五戒。十戒。
十二可從戒。十四持身戒。二十四戒。三十六

戒七十二戒。一百八戒。三百大戒。或修上清齋。金錄齋。三元齋。三七齋。庚申齋。甲子齋。本命齋。如是齋戒。若有善男子。善女人。受持之者。名係天人。世世生生。不失人身。富貴聰明。人中殊勝。五體具足。十相端嚴。且人之生也。

皆受五方五老帝君。各降真氣。金章靈符。混
合自然。化生為人。吾今宣說東方第一金章
靈符。真文神呪。

東方九氣

始青天中

青靈始老


九氣天君

真人按筆

下注人身

木德結秀

會道合真



此章靈符鎮人肝中。若人肝受病。以朱書燒
灰服之立愈。

南方第二金章靈符真文神呪。

南方三氣

赤靈丹天

丹靈真老

三氣天君

司命司錄

絳闕尊神

火德明秀

會道合真



此章靈符鎮人心中若人心受病以朱書燒
灰服之立愈

中央第三金章靈符真文神呪。

總監衆靈

十二之天

黃靈玄老

十二天君

都錄校籍

主鎮脾神

土德鎮秀

會道合真



此章靈符鎮人脾中若人脾受病以朱書燒

灰服之立愈

西方第四金章靈符真文神呪。

西方七氣

太白之天

皓靈皇老


七氣天君

記名安魄

主鎮肺神

金德堅秀

會道合真



此章靈符鎮人肺中若人肺受病以朱書燒
灰服之立愈
北方第五金章靈符真文神呪。

北方五氣

玄中之天

五靈玄老

五氣天君

追生落死

主鎮腎神

水德善秀

會道合真



此章靈符鎮人腎中若人腎受病以朱書燒

灰服之立愈

爾時

老君再說此五方真文神呪即召五方五斗星君降此靈符真文神呪各授五斗星君即

以金書玉篆。各依其方。總得受持。注生世人。
以此靈文。安鎮五臟。各鎮人身。凡人性命。皆
由九天生氣。五斗星君。本命元辰。主掌靈神。
若復有人。能知根本。但遇三元五臘。本命生
辰。北斗下日。嚴置壇場。隨力章醮。供養五方

五老。乃吾化身。注生聖衆。五斗星君。本命元
辰。醮獻錢財。以答衆真。注我生身。得生中國。
得遇大道。廕祐之恩。當生之時。天曹地府。願
許本命錢。且甲乙生人。命屬東斗九氣。為人
受生之時。曾許本命銀錢九萬貫文。丙丁生

人。命屬南斗三氣。為人受生之時。曾許本命銀錢三萬貫文。戊己生人。命屬中斗一十二氣。為人受生之時。曾許本命銀錢一十二萬貫文。庚辛生人。命屬西斗七氣。為人受生之時。曾許本命銀錢七萬貫文。壬癸生人。命屬北斗五氣。為人受生之時。曾許本命銀錢五萬貫文。若有善信男女。種諸善根。善根不斷。世世為人。當須醮送五斗本命銀錢。天曹地府。各有明文。十二本命。十二庫神。子生之人。第一庫中。辰生之人。第二庫中。申生之人。第

三庫中。亥生之人第四庫中。卯生之人第五庫中。未生之人第六庫中。寅生之人第七庫中。午生之人第八庫中。戌生之人第九庫中。巳生之人第十庫中。酉生之人第十一庫中。丑生之人第十二庫中。乃是生人。各自財祿。

此乃生人財祿之庫也。凡生人財祿之庫。皆在十二庫中。凡生人財祿之庫。皆在十二庫中。凡生人財祿之庫。皆在十二庫中。

命庫。若人本命之日。依此燒醮了足。別無少欠。即得見世安樂。出入通達。吉無不利。所願如心。自有本命星官。常垂蔭祐。使保天年。過世之時。不失人身。得生富貴。文武星臨。財星祿星。五福照耀。身命胎宮。安樂長壽。不值惡緣。若有男女生身果薄。無力章醮。可於本命之日。請正一道士。或一。或二。或三。或五。或於宮觀。或就家庭。持誦五斗金章寶經。或以自願持誦。每誦一遍。折錢一萬貫文。又志心持念。托化受生天尊。或千。或萬。當來托生人中。

三世長為男子之身。五體全備。十相端嚴。一切恭敬。得遇無上正真之道。是時

五方五老帝君。五斗星君。南斗六司星君。北斗七元星君。九天聖衆。本命星官。元辰星官。功曹靈官。玉童玉女。一會神仙。得聞

老君說此真經。一時歡喜。禮謝玄元。各願受持。時有始老帝君。出班長跪而作是偈。稽首禮謝。珍重而退。

稽首真元無上尊。一心信奉不思議。
如斯妙法未曾聞。今日今時盡得知。

能為黑暗開光明
能為疾病作良醫
妙哉神呪五靈符
誓願歸依各受持

太上老君說五斗金章受生經

太上老君說常清靜經

老君曰。大道無形。生育天地。大道無情。運行日月。大道無名。長養萬物。吾不知其名。強名曰道。夫道者。有清有濁。有動有靜。天清地濁。天動地靜。男清女濁。男動女靜。降本流末。而

生萬物。清者濁之源。動者靜之基。人能常清
淨。天地悉皆歸。夫人神好清。而心擾之。人心
好靜。而慾牽之。常能遣其慾。而心自靜。澄其
心。而神自清。自然六慾不生。三毒消滅。所以
不能者。為心未澄。慾未遣也。能遣之者。內觀

其心。心無其心。外觀其形。形無其形。遠觀其物。物無其物。三者既悟。唯見於空。觀空亦空。空無所空。所空既無。無亦無。無既無。湛然常寂。寂無所寂。慾豈能生。慾既不生。即是真靜。真常應物。真常得性。常應常靜。常清靜矣。如此清靜。漸入真道。既入真道。名為得道。雖名得道。實無所得。為化衆生。名為得道。能悟之者。可傳聖道。

老君曰。上士無爭。下士好爭。上德不德。下德執德。執著之者。不名道德。衆生所以不得真

道者。為有妄心。既有妄心。即驚其神。既驚其神。即著萬物。既著萬物。即生貪求。既生貪求。即是煩惱。煩惱妄想。憂苦身心。便遭濁辱。流浪生死。常沉苦海。永失真道。真常之道。悟者自得。得悟道者。常清靜矣。

仙人葛公曰。吾得真道。曾誦此經萬遍。此經是天人所習。不傳下土。吾昔授之於東華帝君。東華帝君授之於金闕帝君。金闕帝君授之於西王母。西王母皆口口相傳。不記文字。吾今於世。書而錄之。上士悟之。昇為天官。中

士悟之。南宮列仙。下士得之。在世長年。游行三界。昇入金門。

左玄真人曰。學道之士。持誦此經者。即得十天善神。擁護其身。然後玉符保神。金液鍊形。形神俱妙。與道合真。

正一真人曰。人家有此經。悟解之者。灾障不干。衆聖護門。神昇上界。朝拜高真。功滿德就。相感帝君。誦持不退。身騰紫雲。

太上老君說常清靜經

太上洞玄靈寶天尊說大通經

真空章第一

先天而生。生而無形。後天而存。存而無體。然而無體。未嘗存也。故曰。不可思議。

玄理章第二

靜之為性。心在其中矣。動之為心。靜在其中矣。心生性滅。心滅性見。如空無相。湛然圓滿。

玄妙章第三

大道無象。故內其攝於有。真性無為。故外不生其心。如如自然。廣無邊際。對境忘境。不沉

於六賊之魔。居塵出塵。不落於萬緣之化。致靜不動。致和不遷。慧照十方。虛變無為。頌曰。有法悟無法。無修解有修。包含萬象體。不罣一絲頭。

太上洞玄靈寶天尊說大通經

無上赤文洞古經

操真章第一

有動之動。出於無動。有為之為。出於無為。無
為則神歸。神歸則萬物云寂。不動則炁泯。炁
泯則萬物無生。神神相授。物物相資。厥本歸
根。默而悟之。我自識之。入於無間。不死不生。
與天地為一。

入聖章第二

忘於目則光溢無極。泯於耳則心識常淵。兩
機俱忘。入衆妙門。純純全全。合乎大方。溟溟

洋洋合乎無倫。天地之大。我之所維。萬物之衆。我之所持。曷能終窮。以語其祕哉。

住世章第三

養其無相。相故長存。守其無體。體故全真。全真相濟。可以長久。天得其真。故長。地得其真。故久。人得其真。故壽。世人所以不能長久者。為喪其無相。散其無體。不能使百骸九竅與真體俱存。故死矣。呪曰。天地人三才明。北極降。弼英靈。除灾障。度超升。鉏兇惡。剪鬼形。無上赤文洞古經。

太上靈寶天尊說禳災度厄真經
爾時

天尊在禪黎國土與大道真仙萬萬大千人
諸天尊及諸天龍鬼神盡來集會受吾約束
世間若有善男子善女人或有年災月厄遊

城赤鼠之厄。天羅地網之厄。命窮筭盡之厄。
疾病纏綿之厄。落水波濤之厄。虎狼蛇之
厄。水火盜賊刀兵生產之厄。山林樹木杜穆
之厄。土石橋梁之厄。毒藥咒詛之厄。惟願今
對

玉皇天尊。大道真聖。懺悔解穰。度脫身中灾
厄。一一解散。勿為留難。勅諸天神王。並降聖
力道力。承斯經力。恩力。衛護弟子。授持念誦
此經已後。解穰陽九百六之災。三衰八難。九
橫五苦之厄。如求如願。所履平安。出入行藏。

所求利益。所願遂心。於是衆等聞說此經。皆
大歡喜。信受奉行。

太上靈寶天尊說禳災度厄真經

太上說南斗六司延壽度人妙經

老君告天師曰。此經乃九天八會之真文。三

洞三清之上道。

元始天尊昔經歷于七億萬劫。天地始終人
倫生死。五運遷變。萬景興衰。而

天尊於今猶宴居景雲之上上清之境修鍊
至真敷揚妙道愍念羣生大慈不捨吾昔得
傳付是經今當授之於汝汝宜選奉道之士
謹修行之人天陽地陰一合而生成兩曜兩
曜行度五緯周天是謂七政則七星九元北
斗也每以杓隨月建分指節氣二十四氣二
十八舍應下土七十二候三十六禽舍中有
斗宿六星是則號南斗六司與北斗七政分
職共理三才六合八卦九宮總轄中外百辟
官品乃紫微太微兩極都曹也上係十二分

次天真靈神。下統十二分野地祇主者。四瀆
五嶽九州八紘。名山大川。城隍社廟。中及人
民群類萬物。無不計係。其簿籍掌握世人善
惡矣。北斗位處坎宮。名同月曜。降神於人。名
之為鬼也。主司陰府。掌御水源。特濟生聚。功

莫大焉。南斗位處離宮。名同日曜。降神於人。
名之為魂也。主司陽官。宰御火帝。將濟動用。
德莫大焉。洎有天地。迄至于今。二司兩極。同
共陶鑄萬品。生成萬物。注擬天人之爵秩。增
減士庶之祿俸。延促年齡。去留災福。莫不由
其與奪也。所以然者。乃知陽日陰月。南北二
司。魁斗魁罡。受性水火。稟質陰陽。助天地而
育物。體道德而垂光。物得而豐也。非此而孰
能乎。人得而生也。非此而孰為乎。是故。
天尊殷勤嗟憫。觀爾含靈。一如赤子。闡教救

護令保生性。其救護法。使一切善男善女。不以高卑。皆應志心。常當恭敬。若或時觀日曜月曜。南斗北斗。則鄭重叩頭。請乞祐護。願賜恩福。上言呼稱至聖至尊真宰真君。矜哀凡冗。宥赦過咎。即再拜不得懷於輕慢。反招殃累。

老君曰。爾等男女。能依吾所授奉教而行者。若有所告。請欲消災度厄。增福延年。保家屬之團圓。祝封疆之寧謐。或欲免息塚訟。削死注生。皆當上章投詞。設醮求請。無不如意也。

爾時

老君為天師重宣言

南斗火官除毒害

北斗水神滅凶災

一切所求皆稱遂

萬般滯悶悉通開

能依經法冥心醮

必當隨願契靈臺

凡在有情常頂禮

禍厄無因輒敢來

老君曰神真之妙。凡世難言。凡夫愚昧。貴遠

賤近。近者身也。目見日月星斗。耳聞風雷韶

雅。鼻嗅蘭麝腥臊。舌了甘辛酸苦。口宣言語

音響。至於手執足行。自生及老。皆不可離水

火。今凡夫見之。若不見聞其言。如甚瞶。殊不知成立生性。皆是天地日月星斗與之。假如四大正茲一氣生生之生。全繫水火。水火比於道之真體。故不可暫離。可離而獲存者。非物非人。吾今叮嚀與在世男女。說此要道。普

令發心求請醮獻。知有神真。信吾教示。更能
於四時月旦。八節十二氣。三元三會。五臘本
命。是諸良時吉日。皆可上章拜表。投詞獻款。
請乞恩福。懺罪消災。然燈獻果。供養禮拜。其
福無量也。

南斗第一天府司命上相鎮國真君

南斗第二天相司錄上相鎮嶽真君

南斗第三天梁延壽保命真君

南斗第四天同益箕保生真君

南斗第五天樞度厄文昌鍊魂真君

南斗第六天機上生監簿大理真君

如是六星真君。六星童子。火鈴將軍。凡人轉
誦此經。切湏至誠。虔心禱祝。無不應驗。唯在
精勤。拜表上章。真聖自降。必獲延年。長生道
性。

老君曰。此六司真君。神性急速。能傾心求請。
無顛不從。神真感人心。隨事皆諧偶也。夫萬
行之本。一身之根。在乎道氣保固。形命。形命
保固。在乎教法。教法存乎科儀之細密。聲發
響應。形動影隨。形從心移。發足動步。神靈微

妙也。南斗北斗。陶魂鑄魄。魂既受鍊。乃遷轉
生。人能依吾教法。謝已往之非。補將來之短。
洗滌衆災。拜迎百福。唯在嚴潔崇敬。罄志投
誠。必獲度世之僊道。共日月之同年。若有深
信之士。能修設兩極二斗。同醮一壇。各像斗
星。立壇柱。列香燈。鋪排淨茶。供獻果食。果食
可糖餅油餅。荷蒸乳蒸。煎棗湯細茶。不須酒
脯。此最為要道。以斯迎請神真真聖。歡喜降
臨。速得賜其福祐。

老君演此真妙經竟。正一天師與弟子王長。

座前再拜禮謝謹奉
道旨廣為傳行

太上說南斗六司延壽度人妙經

太上洞玄靈寶高上玉皇本行集經卷上

清微天宮神通品第一

爾時

元始天尊昔在清微天中。玉京金闕。七寶玄苑。玉皇宮殿。昇光明座。與無鞅數衆宣說靈寶清淨真不二法門。是時

玉皇尊帝與諸真聖飛天大聖無極神王靈童玉女九千萬人清齋建節侍在側焉。于時玉帝知時欲至。即於會前舉六通力放大光明。遍照諸天。無極梵刹。一切境界皆大震動。

十方無極一切世界俱同琉璃玻瓈。無有隔礙。十方來衆。並乘五色瓊輪琅輿碧輦。九色玄龍。十絕羽蓋。麟舞鳳唱。笑歌噦噦。靈妃散花。金童揚煙。讚謠洞章。浮空而來。是時梵天一切金僊。大乘菩薩。四衆八部。承斯光

照。皆乘金碧九霞流景。飛雲玉輿。慶霄四會。三辰吐芳。飛香八湊。旋遶道前。雨衆妙花。如雲而下。遍覆會前。是時帝光遍照諸天。下燭下方。無極世界。同玄都境。凡彼人間。上近九天。通接交連。至親至邇。時彼下方。無極世界。

山陵坡坂溝澗溪谷。緬平如掌。六合至邇。三
境非遙。天寶臺殿。星羅人間。瓊瑰羅列。朗耀
雲衢。七寶欄楯。以界道路。玉樹僊花。清璨珠
實。景秀丹田。芝草覆綿。時彼下方。皆見諸天
鈞天妙樂。隨光旋轉。自然振響。又復皆見鸞
笑鳳唱。飛鳴應節。龍戲麟盤。翔舞天端。諸天
寶花零亂。散落徧滿道路。是時凡聖駭異。幽
暗開光。天人悅慶。踊躍歡忻。凡夫學士。盡得
飛昇。仰觀劫仞寶臺。俯眄紫雲彌羅。是諸世
界。一切人民。咸臻道氣。白首面皺。皆得化度。

惡道苦。一時解脫。時諸罪輩。承斯光力。得生十方諸大天宮。爾時

玉皇即分其身。遍於十方諸大天宮。令諸天宮自然化現。白玉為京。黃金為闕。七寶玄苑。大光明殿。具光明座。幢節幡蓋。異寶奇花。遍布是處。爾時

玉皇即以所分之身。遍於是處。白玉京中。黃金闕內。七寶玄苑。大光明殿。光明座上。普為十方演說清淨解脫之道。時化

玉帝。各以無量天真大聖妙行真人靈妃玉

女侍列左右。是諸玉女。顏容殊妙。端嚴奇特。
天珍異寶。莊嚴身相。言音清徹。衆所樂聞。如
是諸女。其身復出微妙鮮脫自然之香。是香
芬馥周遍諸天。極妙樂土。及餘大地。一切福
處。六道一切衆生。聞是香者。普蒙開度。所謂
天道。人道。魔道。地獄道。餓鬼道。畜生道。若諸
天道。一切天人。或有能聞是此香者。五衰四
相永得除滅。轉增天福。若諸人道。王臣兆庶。
或有能聞是此香者。即得人天長壽之樂。身
或滅度。及得脫殼尸解之道。若諸魔道。一切

諸魔。或有能聞。是此香者。安處天宮。聞戰之苦。各得休息。若諸地獄道一切衆生。或有能聞。是此香者。離地獄苦。得淨土樂。若諸餓鬼道一切餓鬼等。或有能聞。是此香者。即得飽滿。無飢渴惱。若諸畜生道一切畜生。或有能聞。是此香者。脫畜生苦。得智慧樂。爾時諸生天罪衆。既得生是勝天宮已。緣承慈光攝受之故。便自覺悟。各各明了。罪福因緣。與諸眷屬。作天伎樂。來詣帝前。是諸衆等。各各含悲。俱發聲言。前後經

千劫萬劫不見三光。常處黑闇三惡道中。多
受苦惱。伏蒙

玉帝。特便放光。愍救我等。皆生天上。是諸
業悉皆滅盡。無諸繫滯。皆得往生。仰朝
玉帝。各到道前。是諸生天。一切罪衆。說是語

六國辭樂三業繫繫
離此諸罪。章顯法以不難。無即對

已稽首復位。爾時

玉帝出大妙音。普告十方諸天聖衆。汝等諦聽。此諸罪輩。曠劫以來。縱無明性。造十惡業。六塵徧染。三業縈纏。肆意任心。曾無覺悟。陰罪陽過。日積月深。背道違真。順邪棄正。舉心運念。動結憊尤。遂使命過之後。身落三塗。不得解脫。若非今日。遇是法筵。何由出離。爾時諸天化身。

玉帝即以神通。不動其所。移接天人。皆令得至清微天宮。玉清聖境。元始會下。是諸衆等。

不覺不知。是時

天尊衆會。見是十方

玉帝化身。普皆來集。

天尊會前。如無邊明鏡。照諸影像。互相容入。
時諸大衆。稽首瞻仰。

玉帝化身。聖中最尊。增長清信。益加志樂。心
無退轉。起大堅固。時諸天人。延得生天。忽覩
天尊勝會道場。清淨第一。無為功德之所莊
嚴。踴躍歡喜。一時作禮。歎未曾有。爾時十方
諸化

玉皇俱復一體從法席起北向長跪

天尊言曰。往昔去世有國名號光嚴妙樂。其國王者名曰淨德。時王有后名寶月光。其王無嗣。嘗因一日作是思惟。我今將老而無太子。身或崩歿。社稷九廟委付何人。作是念已。即便勅下。詔諸道衆於諸宮殿依諸科教。懸諸幡蓋。清淨嚴潔。廣陳供養。六時行道。徧禱真聖。已經半載。不退初心。忽夜寶月光皇后夢太上道君與諸至真。金姿玉質。清淨之儔。駕五色龍輿。擁耀景旌。陰明霞蓋。是時

太上道君安坐龍輿。抱一嬰兒。身諸毛孔。放
百億光照諸宮殿。作百寶色。幢節前導。浮空
而來。是時皇后。心生歡喜。恭敬接禮。長跪
道前。白

道君言。今王無嗣。願乞此子。為社稷主。伏願

慈悲哀愍聽許。爾時

道君答皇后言。願特賜汝。是時皇后禮謝。

道君而乃收之。皇后收已。便從夢歸。覺而有孕。懷胎一年。于丙午歲正月九日午時。誕于王宮。當生之時。身寶光燄。充滿王國。色相妙

好。觀者無厭。幼而敏慧。長而慈善。于其國中。所有庫藏。一切財寶。盡將散施。窮乏困苦。鰥寡孤獨。無所依怙。饑饉癯殘。一切衆生。仁愛和遜。歌謠有道。化及遐方。天下仰從。歸仁太子。父王加慶。當爾之後。王忽告崩。太子治政。

俯念浮生。告勅大臣。嗣位有道。遂捨其國。於
普明香嚴山中修道。功成超度。過是劫已。歷
八百劫。身常捨其國。為羣生故。割愛學道。於
此後。經八百劫。行藥治病。拯救衆生。令其安
樂。此劫盡已。又歷八百劫。廣行方便。啓諸道
藏。演說靈章。恢宣正化。敷揚神功。助國救人。
自幽及顯。過此已後。再歷八百劫。亡身殞命。
行忍辱。故捨已血肉。如是修行三千二百劫。
始證金仙。號曰清淨自然覺王如來。教諸菩
薩。頓悟大乘正宗。漸入虛無妙道。如是修行

又經億劫始證

玉帝說是語已。法筵清衆異口同聲。嘆未曾有。爾時衆中有一玉女。名曰夜光。從座而起。嚴整衣冠。從容雅步。長跪道前。白

天尊言。臣宿昔何幸。仰侍御前。親奉供養。已

經億劫。三清境界。金闕玉京。寂淡逍遙。快樂自在。嬉遊聖域。餐聽法音。未嘗見此希有之事。不審向來光內。所現十方諸天。變現聖境。皆有

玉帝。應化法身。天真大聖。妙行真人。靈妃玉

女。以為侍衛。是諸玉女。相貌端嚴。形體殊妙。出眾妙香。無與等者。復蒙

玉帝神通移接。今皆普集在清微天。未審今此玉女。以何因緣得證如是無上色身。思聖慈示。以未悟爾時。

天尊謂夜光玉女言。汝固初入聖流。雖有智慧。未能明了。此諸玉女。乃自往昔無量劫中。修諸妙行。具解脫門。同清淨信。同清淨解。同清淨念。同清淨行。同清淨身。同清淨心。同清淨意。同清淨果。同清淨報。同大慈心。同大悲心。覆護衆生。如母撫念。愛於赤子。奉戒專一。冥心大道。清齋弘誓。千萬劫中。尊奉

玉帝。此諸玉女。非實是女。皆天至真。為度群生。現玉女身。是故身色神通智慧。隱顯變化。與帝同焉。爾時夜光聞是說已。心得開悟。稽

首歡喜。默然復位。爾時

高虛清明。天主與諸天眷屬。馭八景鸞輿。蔭九光寶蓋。奏玄歌妙樂。詠無量洞章。散天寶花。噴天真香。飛步遊空。來詣道前。承

天尊玉帝威神之力。是諸寶花。即於空中。化

一寶蓋。蔭覆大衆。無不周徧。是時

高虛清明。天主見此希有。稽首長跪。白

天尊玉帝言。賤臣懈怠。後會法筵。今日吉慶。興此法橋。幽顯凡聖。普霑聖澤。放大光明。現希有相。上照諸天。四梵六慾。一切樂土。諸真

聖衆觀此光明。皆悉雲集。下照下方。無極世界。同玄都境。近接九天。靈風奏樂。宮商相和。激朗雲庭。皆成洞章。一切衆生。咸臻道化。鄮都鐵圍。長夜九幽。一切地獄。受苦衆生。盡承光力。皆生諸天。得受快樂。令臣所散天寶奇花。旋結成蓋。遍覆大衆。盡乃斯光。威神之力。臣等千劫良因。九天運會。皇道蕩蕩。正法興隆。今日大吉。咸仰玄功。是時高虛清明天主。以偈讚玉帝曰。

金闕玄穹主 高上玉皇尊 妙相冠諸天

慈光燭三界

真聖妙道師

天人依仗師

大乘垂法語

真一指迷徒

功德若虛空

讚揚無窮盡

是穹蒼主。浩劫之尊。妙見妙知。無等無倫。湛
寂真淨。杳亡杳存。上聖上靈。大神通。光明藏。

聖

大丈夫開化人天。教道無窮。大慈大悲。流煥法輪。為度羣生。是號

玉皇。穹蒼真老。妙圓清淨。智慧辯才。至道至尊。開度衆生。故演是光。爾時高虛清明天主。說偈讚歎已。

天尊普告四衆云。是帝身。即道身也。非常體也。是無量功德之身。是清淨自然之身。是神明堅固不壞真空無上法身。威靈恢廓。名聲周徧。無幽不開。神奇堂堂。難可稱焉。是帝非有為功德之所熏修。而帝昔雖下生人間。多

劫行化。示大神通。而身清淨。未嘗不在金闕。
分身變化。應現隨方。利濟羣生。超昇道岸。普
垂教法。開悟後人。依按奉行。登真成道。以斯
功德之所莊嚴。是故光明常充。諸天神智妙
達。莫可度量。是身光明。皆具妙號。所謂大神
通光。大慈悲光。大喜捨光。大忍辱光。大平等
光。大柔和光。大自在光。大利益光。大如意光。
大智慧光。大吉祥光。大解脫光。大歸依光。大
功德光。大圓滿光。大無礙光。無能勝光。是故
汝等欲見是帝。乃不可得者。緣以汝等尚於

身口不捨結習煩惱行業。由是障故。不能得
觀是帝慈顏。吾今為汝時會眾等。宣示斷障
之法。汝等大衆。宜各奉行。時諸大衆。不勝喜
躍。各于至尊几前。稽首作禮。俱欲願聞。

天尊言曰。斷障之法。當生大悲。無起疑惑。無
起貪嗔。無起淫慾。無起嫉妬。無起已受言。無起
凡情。無起凡思。無起貪妬。無起聲色。無起是
非。無起憎愛。無起分別。無起高慢。無起執着。
凝神澄慮。萬神調伏。心若太虛。內外貞白。無
所不容。無所不納。無令外邪亂其至道。牽失

真宗。敗其靈根。盜其至寶。致爾萬劫。永墮凡
流。透入俗網。萬魔來攻。百千萬劫。不聞妙法。
鬼神執誅。從生入死。是故汝等。應當志心。善
護真宗。無令喪失。如前所說。如是諸障。汝等
各各當除。斷之。身得清淨。超度諸難。是名道。

凡四聖。晉叨道蔭。竊以凡夫短景。劫運將終。
正道宜行。以濟兆民。使修真之子。有期輕舉。
末代蒸民。俱獲壽考。自昔元始。洞玄靈寶。赤
書玉篇。真文生於元始之先。空洞之中。天地
未根。日月未光。幽幽冥冥。無祖無宗。無氣無
象。無色無名。無形無緒。無音無聲。混沌太無。
靈文菴藹。乍存乍亡。二儀待之以分。太陽待
之以明。靈圖章運。玄象推遷。乘機應運。於是
存焉。

玉帝授臣靈寶祕篆。大不可思議神呪。故天

地得之而分判。三景得之而發光。靈文鬱秀。
洞映上清。茲乎始青之天。而色無定方。文勢
曲折。不可尋詳。

元始鍊之於洞陽之館。冶之於流火之庭。鮮
其正文。瑩茲光芒。洞陽炁赤。故號赤書。靈圖
既煥。萬帝朝真。飛空步虛。旅行燒香散
花。口詠靈章。是時天降十二玄瑞。地發二十
四應。上慶九天之靈輿。讚三天之寶明。神風
既鼓。皇道咸暢。元始登命。太真按筆。玉妃拂
筵。鑄金為簡。刻玉為章。五老掌籙。祕於九天。

靈都之館。玉女典香。太華執巾。金童侍衛。玉
陸朝軒。九天上書。非鬼神所聞。故天寶之以
致淳。地祕之以致安。五帝掌之以致鎮。三光
乘之以高明。上聖奉之以致神。高尊掌之以
致真。五嶽從之以得靈。天子得之以致治。國

祚享之以太平。實靈文之妙德。乃天地之玄
根。威靈恢廓。普加無窮。蕩蕩大化。為神明之
宗。其量莫測。巍巍乎太空。明真有格。今當以
行。是時元始革運。玄象開圖。靈文鬱秀。神表
五方。分判天地。開化萬靈。此太玄之寶可得
暫披於靈韞乎。今

皇道敷暢。澤被十方。仰觀劫運。真風宜行。臣
私心實欲使雲陰八遐。風灑蘭林。寒條仰希
華陽之繁。朽骸蒙受靈輿之津。仰對
元慈。下伸丹懇。惟願哀閔。撫念蒼生。不審

靈寶玉篇真文。可得見授。下教於未聞者乎。
於是

元始天尊撫机高抗。凝真遐想。觀時已至。普
謂時會。一切真聖。論定陰陽。推數劫會。移校
河源。檢錄天度。選擇種人。指拈太無。嘯朗九
玄。永無開聽於陳辭。有若閉礙求真之路。是
時五老上帝。啓問不已。良久

元始天尊。乃垂眄眄之容。慨爾歎曰。惟乎深
哉。子今所扣。豈不善乎。此元始靈寶之玄根。
空洞自然之真文。生天立地。開化神明。施鎮

五嶽安國康民靈寶玄妙。為萬物之尊。天發
玄瑞。靈應自然。今三天鑒運。六天道行。雜法
開化。當有三萬六千種道。以釋來者之心。此
法運訖。三龍之後。庚子之年。雜氣晉消。諸天
慶會。吾真道乃行。今且可相付。當錄於上館。
未得行於下世。玄科有禁。不得便傳。子可詣
靈都紫微上宮。視天音於金格。取俯仰於神
王。然後當使得備天文。以總御元始之天也。
於是五老上帝。與諸真聖。清香執戒。徘徊雲
路。嘯命十天。上詣上清太玄玉都。寒靈丹殿。

紫微上宮受俯仰之格。乃知天真貴重。難可
即聞。還乃更詣。

元始天尊。諮以禁戒之儀。遜謝不逮。是時
天尊慈顏愍喻。靈闕廓開。登命五老上帝。甯
洞陽玉館。披九光八色之韞。雲錦之囊。出元

始靈寶赤書玉篇真文金書玉篆微妙秘密
運御乾坤大光明圓滿大神呪玉章以付
五老上帝及諸真聖使依玄科按法以傳
東方安寶華林青靈始老蒼帝所受神呪誥
命。

東方九炁
中有老人
歲星輔肝
四景廻旋
承炁輔非

始皇青天
總校圖錄
角亢鎮真
箕主七辰
掃除災羣

碧霞鬱壘
攝炁舉僊
氐房心尾
正斗明輪

東山神呪

攝名九天

赤書符命

制會艷山

束魔送鬼

所誅無蠲

悉詣木宮

敢有稽延

下制東河

溟海水神

大劫洪災

蛟龍負身

水府開道

通途百千

上帝赤文

風火無間

右玉皇誥命。以錫東方安寶華林青靈始老
蒼帝九炁天君。令統御東方諸天諸地。日月
星宿。名山靈洞。水府泉宮。上聖高尊。真仙聖
衆。一切威靈符命所臨。如誥奉行。

南方梵寶昌陽丹靈真老赤帝所授神呪誥
命。

南方丹天

赤帝玉堂

中有大神

號曰赤皇

上炎流烟

三炁勃光

神僊受命

應會太陽

熒惑輔心

井鬼守房

柳星張翼

亢御四鄉

軫總七宿

迴轉天常

召運促會

正道驛行

赤文命靈

北攝鄴山

束送魔宗

斬滅邪根

符教所討

明列罪原

南山神呪

威伏八方

羣妖滅爽

萬弒摧亡

南河水帝

太伯龍王

神呪所行

普掃不祥

洪水飛災

止蛟召龍

開除水逆

千道萬通

敢有干弒

南齊書卷之六十二 南齊書卷之六十二

攝送火宮

赤書所告

莫有不從

右玉皇誥命。以錫南方梵寶昌陽丹靈真老
赤帝。三炁天君。令統御南方諸天諸地。日月
星宿。名山靈洞。水府泉宮。上聖高尊。真仙聖
衆。一切威靈。符命所臨。如誥奉行。

中央寶劫洞清玉寶元靈元老黃帝。所受神
呪誥命。

中央總靈

黃上天元

始生五老

中皇高尊

攝炁監真

總領群仙

典錄玄圖

宿簡玉文

催運上炁

普告萬神

鎮星輔牌

截邪斬姦

醮正玄斗

金馬驛傳

中黃總炁

流鍊神宮

翦除不祥

中山神呪

九水河源

迴度北元

醮魁魁醮

明度天關

統攝無窮

敕攝北帝

莫有當前

召龍上雲

不得怠縱

魁魁主非

掃穢除氛

九天符命

鎮星吐輝

遏塞鬼門

制會黃河

善惡悉分

千妖萬姦

上對帝君

莫有干弑

太陽激燄

赤書玉字

宣告普聞

右玉皇誥命。以錫中央寶劫洞清玉寶元靈

元老黃帝。一炁天君。令統御中央皇天后土。

日月星宿。名山靈洞。水府泉宮。上聖高尊。真

仙聖衆一切威靈符命。所臨如誥奉行。

西方七寶金門皓靈皇老白帝。所受神呪誥命。

西方素天

白帝七門

金靈皓映

太華流氛

白石峩峩

七氣烱烱

上有始生
主校九天
太白檢肺
主制七關
赤書玉字

皇老大神
檢定圖籙
奎婁守魂
參總斗魁
九天正文

總領肺氣
制召上僊
胃昂畢腎
受符北元
攝召萬炁

普歸帝君

西山神呪

八威七傳

符水上龍

召山送雲

在所校錄

同到帝門

輔衛上真

斬滅邪源

若有不祥

截以金關

赤書符命

風火驛傳

右玉皇誥命。以錫西方七寶金門。皓靈皇老

白帝。七炁天君。令統御西方諸天諸地。日月

星宿。名山靈洞。水府泉宮。上聖高尊。真仙聖

衆。一切威靈。符命所臨。如誥奉行。

北方洞陰朔單鬱絕。五靈玄老黑帝。所受神

咒誥命。

北方玄天

五炁徘徊

中有黑帝

雙皇太微

總領符命

仙鍊八威

青裙羽襪

龍文鳳衣

上帝所舉

制到玉階

北辰輔腎

斗牛衛扉

女虛危室

豁落四開

壁總七星

執凶糾非

却災掃穢

明道動輝

北山神呪

激揚起雷

流鈴煥落

攫天振威

北酆兩部

萬妖滅摧

九河傾訖

鳥毋群飛

蛟龍通道

水陌洞開

赤文玉書

驛龍風馳

右玉皇誥命。以錫北方洞陰朔單鬱絕五靈
玄老黑帝五炁天君。令統御北方諸天諸地。
日月星宿。名山靈洞。水府泉宮。上聖高尊。真
僊聖衆。一切威靈。符命所臨。如誥奉行。

道言是大神呪者。

元始之妙言。玉皇之真誥。上清自然之靈書。
九天始生之玄札。空洞之靈章。上聖之祕語。
玉晨之尊典。成天立地。開張萬真。安神鎮靈。

成生兆民。匡御運度。保天長存。上制天機。中
檢五靈。下策地祇。嘯命河源。運役陰陽。召神
使僊。此至真之妙文。神應自然。致天高澄。令
地固安。保鎮五嶽。萬品存焉。

玉帝昔授五老上帝。是時五帝跪捧其章。祕

題靈都之館。天真皇人昔書其文。掌之於上。
清真境。太玄玉都。寒靈丹殿。紫微上宮。累經
劫運。而其文保固天根。無有毀淪。與運推遷。
是大神呪。混之不濁。穢之愈清。毀之不滅。滅
之極明。大有之文。天真所尊。自無真名。帝圖
刻簡。昭示來生。斯文隱秘。不得窺聞。有得之
子。保萬炁長存。勤行修奉。刻致神仙。

洞玄靈寶玉皇功德品第三

爾時玉虛上帝白

天尊言。唯願慈悲。願為四衆帝釋等。及四梵

天王。一切諸天。一切諸仙。及未來一切衆生。
持是經人。說利益事。爾時

天尊告玉虛上帝言。快哉斯問。不亦善乎。汝
以慈悲愍念衆生。故請問於我。

天尊言曰。若有三界十方。無量國土。及國王

大臣。或兵戈並起。疫氣大行。水旱蟲蝗。凶灾
饑饉。是其國君。后妃太子。宰輔大臣。當發慈
悲。為其黎庶。遍勅國內。州縣鎮宰。令諸道流
清淨嚴潔。于其觀內。設大齋醮。六時行道。為
轉此經。當得國土清平。五穀豐熟。黎庶安泰。

若復有人入諸山林。遇毒惡獸。但能存想。一
念真經。山神衛護。猛獸自退。終不害已。若入
江入海。採寶求珍。值遇惡風。如法持念。是此
真經。風浪頓止。安穩達岸。若在軍陣。戈戟既
接。兩刃相交。存心默念。是此真經。是諸惡賊
悉自退散。若在牢獄枷鎖之中。淨心定慮。存
念真經。冤枉自伸。即得解脫。若為邪精鬼賊
衆惡所加。如法持念。是此真經。衆邪遠避。自
然除愈。若人為求嗣息。如法尊重持念此經。
帝勅天曹。明檢丹籍。九品之內。四果仙人。運

應數合降謫下生。為其作子。才辯明慧。人中
尊貴。若婦人臨難之月。如法持念。是此真經。
即得母子平安。生福德男女。人所愛敬。若為
求官進職。爵祿亨達。貴遇人君。如法持念。是
此真經。即得職務遷轉。子孫榮遇。世世不絕。

若人欲求資財殷富。如法奉持。是此真經。即得財寶充溢。衣食自然慶流。子孫傳之萬世。若人被諸惡星之所照臨。困苦床枕。如法持念。是此真經。是諸惡星。返降吉祥。若人命過。應入地獄。注名惡籍。父母師長。夫妻男女。當為亡人持念真經。或安置道場。幡花供養。即得亡者鬼籍盡除。神生淨土。同苦罪衆咸蒙護度。承斯勝利。皆生天上。又此經所在之處。常有十天至真大聖。無極飛天神王。侍衛供養。持是經人。當得自稱為正一真人。是人在

處自得十方至真至聖金剛力士潛護其人。
如護己身。若出若入。遊行之處。百邪避路。魔
鬼殄除。精靈伏藏。一切災殃。不能侵近。是持
經人。命欲終時。更不見諸地獄惡相。即見天
宮。一切玉女。持幢下迎。而生天上。如天福盡。
下降人間。即得千生萬生中。常為帝王。令國
土清平。人民樂業。兼得為王。獲宿性通。遵奉
大道。展轉修持。至登道岸。是持經人。獲福如
是。又若有持是經人。遇雨下時。起大悲心。如
法向空念此經三卷一遍。其雨所霑。面所向

方。一切衆生。五逆十惡。一切重罪。悉皆消滅。
一切重病。便得痊愈。是諸衆生。命終之後。不
墮地獄。神生淨土。蓮花化生。何況持是經者。
又若有持是經人。若行於道路。值大風起。吹
是持經之人。觸身之塵。是塵所需。一切衆生。
一切惡業。悉皆滅盡。更不墮三惡道。當生天
上。故知持經功德。不可思議。是持經人。若在
江在河在海。沐浴其身。是水所需。其中衆生。
魚鱉黿鼉。一切水族。是諸衆罪。悉得除滅。盡
此一報之身。命過之後。更不受胎卵濕化。一

切等身。是持經人。口出一切語言。或善或惡。
一切天魔外道聞者。皆是清淨法音。是持經
人。若遇諸神廟。能為其神誦詠。是經。是諸鬼
神。得聞是經。即脫鬼趣。登真僊道。恭敬是人。
如奉是

帝。若人在世。不孝父母。不敬三寶。殺生偷盜。邪淫妄語。作種種極重罪業。將命終時。若有道心。正信衆生于其亡者。未氣斷時。起大悲心。于其頭邊念

帝尊號。或一七遍。二七遍。三七遍。四七遍。乃

至百遍千遍。是其亡者生前所造諸不善業。悉得消滅。更不墮諸惡趣。神昇九天。何況受持是此經者。又若復有人。自從往劫。乃至今身。輪轉人天。漂沉世域。積千愆萬過。在於已身。若遇是持經人影。暫映其身。如為

帝光之所攝受。或與同語。或聞其聲。如奉
帝言。道語慰諭。彼人罪障。永得除滅。又若有
持是經人。造作長幡書。

帝名號于其幡上。懸諸長竿。或是觀宇。或在
家庭。是幡被諸風吹。所指方面。一切衆生。皆

霑勝利。一切惡業。悉得除滅。又若有持是經
人書。

帝名號在一切有聲物上。或鐘或磬。鈴鐸鏡
鉢。一切道具。法事之屬。或以道場。或以戲擊。
或被風觸。是聲出時。或遠或近。一切衆生。聞

是聲已。所有罪障。悉得清淨。又若有持是經
人。了悟生死。深入山林。修真學道。或時登臨。
上山顧望。目所及處。山林溪谷。含生品類。有
形無形。胎卵濕化。動植飛潛。種種諸類。所有
罪業。永得除滅。身心清淨。命終生天。何況受
持。是此經者。當知是人。即是道藏功德身也。
爾時

天尊謂玉虛上帝言。今我略說。未盡其妙。若
廣說之。凡流邪見。疑惑不信。是經功德。窮劫
難言。爾時

玉虛上帝聞是說已。心生歡喜。不勝踴躍。瞻
仰慈顏。稽首讚歎。而作頌曰

九天之上

謂之大羅

玉京金闕

雲層嵯嵯

中有天帝

仁慈惠和

至道無敵

降伏衆魔

天寶靈符

玉律金科

神像億萬

幢幡衆多

聞者罪滅

永出愛河

是號玉皇

穹蒼真老

妙圓清淨

智慧辯才

至道至尊

三界師

混元祖

無能勝主

四生慈父

高天上聖

大慈仁者

十號圓滿

萬德周身

無量度人

拔生死苦

爾時玉虛上帝。說是頌及十號已。是諸天衆
異口同音。歎未曾有。

太上洞玄靈寶高上玉皇本行集經卷中

太上洞玄靈寶高上玉皇本行集經卷下

天真護持品第四

爾時

昊天上帝聞說經法從座而起長跪
帝前白言

玉帝顧為大衆及諸人天持是經人說利益
事爾時

玉皇尊帝興方便意開利益門宣玉璽科傳
靈寶法告於

昊天上帝言汝今諦聽當為汝說受持功德

扶危救苦。利益存亡。神妙之事。衆真稽首。俱
發聲言。弟子臣等。今日幸聞湛然常住之法。
莫不上福三界諸天。下消三塗毒害。惟願慈
悲。愍臣等故。演斯妙義。

玉帝告曰。若有衆生。孝養父母。恭敬三寶。竭
忠於君。不殺不盜。不淫不妬。不嗔不恨。不驕
不詐。奉戒持齋。冥心大道。生尊重心。持誦是
經。我即敕下周流沙界。遍傳十方。無極世界。
我敕東方東華帝君。青騎神僊兵馬。無鞅數
衆。悉令下降。覆護受持。是此經者。

我敕東南扶桑大帝。與其部衆神僊兵馬。無
鞅數衆。悉令下降。覆護受持。是此經者。
我敕南方朱陵大帝。赤騎神仙兵馬。無鞅數
衆。悉令下降。覆護受持。是此經者。
我敕西南太華元老。與其部衆神僊兵馬。無

我敕西北皇天上帝。與其部衆神僊兵馬。無
鞅數衆。悉令下降。覆護受持。是此經者。
我敕八不可說。無量阿僧祇。悉令下降。覆護受持。是此經者。

鞅數衆。悉令下降。覆護受持。是此經者。

我敕西方皓靈黃老。白騎神仙兵馬。無鞅數衆。悉令下降。覆護受持。是此經者。

我敕西北皇天上帝。與其部衆神僊兵馬。無鞅數衆。悉令下降。覆護受持。是此經者。

我敕北方紫微帝君。黑騎神僊兵馬。無鞅數衆。悉令下降。覆護受持。是此經者。

我敕東北冲虛天君。與其部衆神僊兵馬。無鞅數衆。悉令下降。覆護受持。是此經者。

我敕中央天皇大帝。崑崙蒼老。黃騎神僊兵

馬無鞅數衆。悉令下降。覆護受持。是此經者。
我敕上方來和天君。名山大洞神僊兵馬。無
鞅數衆。悉令下降。覆護受持。是此經者。

我敕下方一切金僊。四衆八部。及諸眷屬。悉
令下降。覆護受持。是此經者。

我敕十方飛天神王。飛天大神。三官四聖。二
曜九星。北斗。南斗。東斗。西斗。中斗。二十八宿。
周天衆星。金剛力士。神王等衆。各與部衆。悉
令下降。覆護受持。是此經者。

我敕降魔力士。四天門王。五嶽四瀆。及餘諸

山。四海。九江。十二河源。山林川澤。一切主者。
令與眷屬。覆護受持。是此經者。諸陰惡處。令
得安穩。

我敕所在一切土地靈官。并溝渠等一切諸
大力鬼王。皆令覆護受持。是此經者。令衆魔
外道。悉皆攝伏。潛形遁跡。高飛海外。遠避他
方。如是山林社稷廊廟。血食之賓。一切鬼神。
當自消滅。五方行病。瘟疫鬼。諸惡鬼神。并
風王水怪。孽龍妖神。土精木魅。盡自消滅。五
虛六耗。夢寐乖常。野道呪咀。蠱毒之類。皆自

消滅心欲願者。一切如意。皆得滿足。是持經人。或不依科教。未能修齋。未具淨戒。以能信受。尊重景慕。是此經典。並同修齋護淨戒者。是人功德。坦然無礙。自在逍遙。號人中聖。德惠長新。同諸真人。爾時

大卷全書

無淨無名

無淨無名

昊天上帝。聞是說已。即於
帝前。乃為歌曰。

大哉至道

無形無名

渺渺億劫

黃道開清

神清朗耀

九魂吐精

玉虛澄輝

太霞高明

玉皇開化

普度天人

三元道養

二象攝生

朽樹故根

已枯使榮

蠢動蛸息

長生化形

懷胎含孕

俱得生成

亡者命過

魂歸三清

魄受鍊度

南宮飛昇

今日大吉

皆得光明

五帝鑒映

普告萬靈

天神地祇

及與河源

五嶽四瀆

及諸名山

洞玄洞虛

洞空洞僊

無極大聖

至真尊神

無窮無極

溥監度生

惡根斷絕

玄都記名

衆真班列

咸聽帝言

經是帝敕

保誦持人

至度道岸

無使灾侵

我奉帝命

一切咸聽

爾時

昊天上帝說是歌已告大衆言此

玉皇妙法語。諸聖祕密言。路絕道斷。微妙難
思。巍巍大範。為神明之宗。保鎮國土。拔度生
死。爾時昊天上帝。說是語時。法筵清衆。咸仰
道言。溥得開悟。于是
天尊而說偈曰。



玉帝功德大 玄理極幽深 生於浩劫前
運化於古今 我今說妙經 愍念諸有情
此誠極妙法 功德中功德 名號最上乘
無比為第一 大光明王尊 威德聖希有
能破暴惡魔 皆令心降伏 能滅極重罪

皆令得清淨 若人聞是經 或聞是帝名
稽首生恭敬 一切罪消滅 十惡四重罪
五逆害父母 信心一稱名 隨聲盡消滅
保護人天衆 四相與五衰 三塗極重苦
人間見厄難 凶年饑饉喪 毒藥及厭魅

手執如意 叩頭禮佛 中
水火不侵 諸惡不侵 中
功德無量 諸善無量 中
功德無量 諸善無量 中

刑獄與冤家 軍陣聞戰苦 山中惡道中
虎豹豺狼等 江海毒龍類 迅雷風雨電
水火及盜賊 蠱毒所中心 失志發狂亂
蛇蝎毒惡蟲 邪魔凶怪神 伺求人便者
由持是經故 普皆自散滅 惡病久沉綿
夢寐亦不安 非理欲殘命 殄滅不為殃
緣遇是經故 安穩得自在 所有希求願
財寶及富貴 以此經功德 如意皆稱遂
神威自在僊 衆德十一曜 三十二天主
二十八宿王 靈妃玉女等 天神及地祇

三界虛空神 江海諸龍王 水火及風神
宮殿與宅舍 山林樹木衆 溝渠井泉神
由持是經故 一切皆擁護 衣食常自然
子孫居富貴 出言人希聞 所至皆恭敬
若為求男女 持誦此真經 帝詔下天曹
落籍天僊人 降謫生其家 為其作男女
顯貴人崇重 七祖盡昇僊 光大慶其門
延及父母親 吉祥常熾盛 灾障不能侵
是故我今說 大衆宜諦聽 慈悲度一切
皆令達上清

于時

天尊普告四衆。凡人持念此經。受持

帝名。皆道根深重。宿有善緣。此經尊妙。普度
天人。但精心恭奉。家國安寧。保命度災。掃諸
不祥。天子王侯得奉之者。致國太平。凶寇自
夷。邊域不諍。兆民歌唱。普天興隆。運推數周。
正道當行。有得之者。天真妙重。祕之祕之。

洞玄靈寶報應神驗品第五

爾時慈悲度厄真人。尋聲救苦真人。濟生度
死真人。萬福護身真人。俱從座起。越班而出。

俱白

天尊言。若諸世末凡夫。雖宿有善緣。得遇是經。被諸邪障之污。本末疑惑。不信是經功德。如是之人。見在過去。於諸地獄。得何罪報。惟願聖慈。說其報應。惡趣之苦。是時

諸是罪當斷正無所

終其心自覺外道邪見無所歸心出精進

天尊謂四真人云。若諸世間。劉強暴惡不善。衆生終日。竟夜對諸道像。無恭敬心。出誹謗語。是罪當墮五無間獄。若得值遇是持經人。設諸方便。誘引勸諭。如是之人。暫滅惡心。信向是經。彼人罪業。淨盡無餘。又若有邪見惡執惡人。覩持是經。生諸惡逆。偏眼邪視。乃至起一惡心。發一惡言。謗黷如是持經之人。其罪過是命終之後。墮大地獄。永無出期。何況世間衆生。得遇是經。不生敬仰。穢手污觸。臆口讀誦。床榻不淨。便將安置。或讀是經。講習。

俗語。共同戲笑。以為常典。如是之人。命過之
後。墮無間獄。永無出期。殃緣九祖。受拷鄧都。
累及後世。害纏子孫。是人于地獄中。歷無量
劫。受大苦惱。遇無邊聖累。承救拔。罪惡小減。
又遇聖人。救拔得出。生餓鬼中。歷千萬劫。不
聞漿水之名。鬼報得出。生畜生中。畜生報出。
若生人中。更生邊夷外道。而復女身。貧寒困
苦。癰殘百病。受無量苦。人所棄擲。求生不得。
求死不得。輕斯經故。獲罪如是。又若復有人。
初雖信受。後復慢易。善惡童子。上奏三官。黑

簿添名。青編減筭。身歿之後。拘閉幽牢。往復
三塗。無由解脫。或於現世。受種種病。疥癩癰
疽。以為果報。憂悲苦惱。日夜相煎。而身或被
橫惡所加。或牢獄繫鎖。非分自害。悟食毒藥。
或被虎狼毒蛇之所食噉。或為冤家之所讎。
對或行山林。值遇惡人。被他屠割。推落崖岨。
或被邪精魍魎之所殘害。或值水火之所焚
漂。或被刀兵之所橫誅。輕斯經故。橫喪天年。
獲如是果。獲如是報。可不悲歟。可不痛歟。故
報汝等。依此奉行。勿生邪念。若諸念不生。萬

緣頓息。塵沙惡業。随心消散。一切灾魔。自然
殄滅。此之功德。不可思議。是誠無比。寂上妙
法。諸經之王。有大利益。非人勿示。若諸天人
五衰四相。輪迴侵逼。能捨除妄想。受持是經。
坐招自然。天福益固。身度三界。與道長存。是

蘇業。乃至。不。是。月。一。
蘇業。乃至。不。是。月。一。
蘇業。乃至。不。是。月。一。
蘇業。乃至。不。是。月。一。

此經典無與等。無能勝。是大威德大神呪。能令一切枯槁。便生枝葉。花果茂盛。能除衆生極重苦惱。能令短命衆生。而得長壽。此經功德。不可思議。歎莫能盡。若不宿植道種。廣種福業。乃至名字。亦不得聞。何況得見是經。依三洞真格。八萬劫一傳。此清都至真上聖所寶秘於玉京金闕宸宮。甚為微妙。難可得遇。此經宿有仙骨。當為九天真仙之人。得遇斯文。承斯緣故。後當齋金寶。從盟師受之。方當乘機應運。乃可付焉。不得輕泄。敬之慎之。於

是天尊重宣此義為說偈曰

設使江河水

波浪能生蓮

慈烏毛能白

如經故難遇

設使龜生毛

堪採為衣服

夜月能消水

如經故難遇

設使蚊蠓足

堪構為舟橋

能載一切重

如經故難遇

設使黃口雀

能銜諸大山

擲之他方界

如經故難遇

設使一葉舟

力能載崑崙

浮渡於大海

如經故難遇

設使諸水蛭

口能生巨齒

其大如象牙

如經故難遇

設使蓬蒿葉

能覆無鞅界

廕庇無鞅衆

如經故難遇

設使鳥梟類

同樹一巢栖

銜食共相食

如經故難遇

設使兔生角

堪用為梯磴

上窮有頂天

如經故難遇

設使鼯鼠等

緣於兔角梯

至天能食月

如經故難遇

設使驢顏唇

色如蘋婆果

復能作歌舞

如經故難遇

設使蠅蟲等

能飲鍾石酒

迷荒而沉醉

如經故難遇

爾時

天尊宣說偈已。普告四衆。是故持是經人名。功德身。一切有情。被其廕。故持是經人名。神

通身一切吉祥。咸臻集故持是經人。名清淨
身。是諸惡業不能侵故持是經人。名威德身。
天魔異道不能攝故持是經人。名無等身上
帝遙唱萬神敬故持是經人。名堅固身。惡劫
大難不能損故持是經人。名道藏身。口出語

又千二百八十八。持是經人。名醫良善。行妙法。安樂

言鬼神仰故持是經人名慈悲身六道衆生。
賴其善故持是經人名大道身出入所在無
怖畏故持是經人名良醫身善行妙法安樂
人故持是經人名光明身常為帝光所懾受
故持是經人名自在身。天宮妙境神能遊故
持經功德說不可盡。又若道士志人能結壇
誦經著新淨衣。於半夜後。閒寂獨處。清淨室
中。叩齒九通。東向端坐。誦詠是經。於是時也。
太真御几。玉妃拂筵。萬神班列。諸天臨壇。三
果侍衛。五帝伺迎。然後閉目靜思存想是經。

不覺身處五雲之內。俄見其身。光明赫奕。上昇天宮。衆真下迎。心有所請。一切應奉。仙丹妙寶。隨意自得。故當依科。閉心奉行。此經乃至三世金仙。十方大聖。皆從此經。依按修奉。故頗得超證。無上妙道。是此帝也。諸佛之師。衆聖之王。是故凡夫。值遇是經。致五帝輔翼。召使神仙。御役神官。運道陰陽。千靈敬仰。萬神懾伏。百邪避路。羣魔束形。命過之後。即得南宮受鍊。飛步上清。逍遙自在。與道長存。又設復世間衆生。曾聞是經。心常渴仰。能於

家中擇清淨處。畫帝尊像。日夜虔虔。晨昏濟
濟。香花燈果。尊重供養。稱名瞻禮。誦詠是經。
是人當得三十種上妙功德。

一者諸仙讚重

二者先亡生天

三者宿殃解脫

四者所往通達

五者無盜賊事

六者所求遂心

七者除水火厄

八者橫事潛消

九者夜夢吉祥

十者疾病不臨

十一者智慧聰明

十二者人見歡喜

十三者衣食豐盛

十四者子孫榮貴

十五者六親見喜
十六者門族和睦
十七者除三惡報
十八者轉女成男
十九者形容端嚴
二十者為國大臣
二十一者生為帝王
二十二者鬼神欽仰
二十三者得宿命通
二十四者諸神護念

爾執天尊身告四眾
此經如新羅寶蓋
二六者光造三昧
二七者白日土泉

二十五者九族受蔭

二十六者處世長年

二十七者有情賴善

二十八者魔王保迎

二十九者決超三界

三十者白日上昇

爾時天尊復告四衆。此經功德能碎鐵圍諸山。竭苦海水。破大地獄。拔重罪苦。降暴惡魔。護諸國土。能滅一切惡鬼。能除一切重病。能解一切惡毒。能離一切惡人。能伏一切毒獸。能摧一切邪道。一切諸天皆令降伏。其餘功德說不可盡。爾時道場大衆。金仙菩薩真聖眷屬。聞是說已。歡喜踴躍。稽首敬禮。而作頌曰。

大哉至道

無宗上真

上度諸天

下濟幽魂

上無師祖

惟道為身

丹臺紫府

金闕玉京

祕此妙法

溥福舍靈

滅我萬罪

增我遐齡

萬神朝禮

魔王保迎

功德昌盛

黃籙書名

渺渺億劫

使我長存

於是衆等說是頌畢稽首皈依奉辭而退

太上洞玄靈寶高上玉皇本行集經卷下

此經自子房校定吾審訂之後無得擅有竊議少加竄易蓋與西王母所傳者契券同天長地久金玉其堅謹記曲老人再書

無上玉皇心印經

上藥三品。神與氣精。恍恍惚惚。杳杳冥冥。存
無守有。頃刻而成。回風混合。百日功靈。默朝
上帝。一紀飛昇。知者難言。昧者難行。履踐天
光。呼吸育清。出入玄牝。若亡若存。綿綿不絕。
固帶深根。人各有精。精極成神。神各有炁。炁
合體真。不得其真。皆是強名。神能入石。神能
飛形。入水不溺。入火不焚。神依形生。精依炁
盈。不凋不殘。松柏青青。三品一理。妙不可聽。
其聚則有。其散則零。七竅相通。竅竅光明。聖

日聖月。照耀金庭。一得永得。自然身輕。太和
充溢。骨化寒瓊。得丹則靈。不得則傾。丹在身
中。非白非青。誦之萬遍。妙理自明。

無上玉皇心印經